

西事江略

一  
八  
函  
冊

西事彙略卷九

迤西陸防各軍總司令部編輯

殖邊

土司

爲錄電飭遵事照得本

巡按師長

昨於二月二十四日會電軍都督府文曰頃據芒市土司

稟稱世受龍陵紳民朦陷前年土司父放平安被其誣害積案多年始經了結懇請改歸騰衝府管轄以恤邊民等情並據遮放猛板兩土司稟稱情事相同均請改隸騰屬前來查地方紳民倚藉官勢敲搯土司已成通弊該土司等與龍紳積怨過深當此邊事初定恐難相安茲聞騰升爲府稟請改隸騰衝查各該土司地方距騰各四五站不等尙可兼顧攷之志乘遮放芒市兩土司初本隸騰茲若改隸騰衝尤覺形利勢便似可照准將該兩土司及猛板土千總改隸騰衝府以示軍府懷惠拊循之德意是否有當伏候核示遵行等因譯發去後隨於本月二十八日奉軍都督府儉日復電開敬電悉所請芒市遮放猛板三土司改隸騰衝府應准照辦希卽分飭遵照等因奉此除分

飭永昌府芒市土司遮放土司猛板土千總龍陵廳遵照外合行錄電轉飭札到該府

廳土司土千總即便遵照

將遮放市猛板三土司卷宗圖冊錢糧稅役具文移送勿違特札將履宗歷冊籍及地方界址圖說申送騰衝府查核特札

陵廳芒市土司遮放土司猛板土千總

為札飭事照得云全前等因奉此除分飭永昌府龍陵廳將各該土司并卷宗圖籍錢糧稅役移送改隸并逕飭各土司並將履歷宗圖冊籍及地方界址圖說申送該府查核外合行轉飭札到該府即便遵照接收妥為管轄督同治理仍將接收日期通報查考切切特札札騰衝府黃守行騰衝自治公所

省城軍都督府鈞鑒准張卸鎮文光咨稱騰衝反正之際籌濟軍需及地方辦公經費搭柱綦艱集紳公議由滇蜀鐵路公司駐騰滙兌處存款項下先後提用銀柒萬伍千捌百壹拾貳兩肆錢勉為接濟以免恐慌因當陞隍之時良非得已之舉現騰事平定綜計各項用款外尙存有騰衝德順號洪盛祥萬發永元升恒壽記明衡貴興祥等商號報効銀貳萬七千五百八十三兩九錢一分本擬將此款撥歸滙兌處藉資彌補於

十一惟查經營邊地需款尤亟或將此項存款移作經營邊地之用統候查核辦理等由並同造冊前來查張卸鎮提用路款數目核與該滙兌處清單相符擬以騰商報効之款撥歸路款稍資彌補亦屬正辦惟現在經營邊地實爲當務之急又當公帑奇絀仰給爲難路政利在交通此舉關係國防路非歲月可期此則且夕難緩且路款之虧已多得此所裨甚細邊費之需有定得此所賴實多酌盈劑虛移緩就急似以撥充經營邊地之費爲尤要同屬以公濟公自可不分畛域如蒙俞允擬將此款撥交騰衝富慎分銀行存儲備用是否有當伏乞核示遵行師長根源叩養印

專送行營李師長鑒奉發尊處養電移緩就急深佩蓋籌此項捐款即照尊處議撥富慎分銀行存儲以充邊費除呈復行司外謹復鐵路存款請咨張鎮詳造清冊報查都督府政豔印

省城軍都督府鈞鑒騰屬商民春延記董友芳報効銀壹萬兩前經電明在案查此款昨已發交自治公所存儲擬請即飭由該公所轉交富慎分銀行存儲將來經營騰衝



邊務之用是否可行祈示遵巡按趙藩師長根源叩馬印

騰越趙巡按李師長鑒馬電悉董友芳報効銀一萬兩交富滇分銀行存備騰越邊用甚善應即照辦除令司外此覆都督府政感印

省城軍都督府鈞鑒查蓋達土司地方前曾設有彈壓委員一員現當紛擾之後亟應練員委充以資綏輯查有自治公所副議長寸開泰堪以調委所遺副議長一職查有許紳藩國學識優裕鄉望素孚堪以接任除分別給委外謹電陳請飭部備案再南甸土司刀定國現來騰謁見當經昭示大義開布公誠諭令安心供職干崖土司刀安仁弟安善於日內在干病故並陳藩根源叩有印

省城軍都督府鈞鑒蓋達彈壓委員寸開泰現患足疾遽難到差稟請辭退前來查該委員患病屬實自應照准茲有委彌渡通判黎民藩前委調查各土司地方尙屬勤能留心邊事本擬飭赴本任現在邊事乏才擬請即委該員暫行充當是差彌渡通判一缺查有張文運人尙老成事理亦復諳練此次核騰中反正用欵張鎮固清白可風該

員復廉潔共信若蒙委任亦可爲有守者勸是否有當乞示遵行藩根源叩歌印  
省城軍都督府鈞鑒月密干崖土司刀安仁在外未歸其弟刀安善又以病故擬請仿  
蓋達例先設一彈壓委員駐紮舊城以資鎮懾查有軍政部咨送迤西差遣員王崇鏗  
老成明練委充彈壓必能勝任如蒙允准乞即電示俾便給委根源叩皓印  
李師長鑒奉發皓馮兩電均悉辦法甚善如議以王崇鏗委充干崖彈壓委員希即轉  
飭妥爲辦理都督府政梗印

省城軍都督府鈞鑒騰衝各土司地除蓋達干崖已設彈壓外其餘隴川猛卯遮放猛  
板芒市各土司幅員廣漠在在鄰緬擬仍劃分區域酌設彈壓近則爲鎮懾之資遠則  
爲經營之備前飭黃守妥爲籌議茲據電稱隴川猛卯遮放三處壤地相連請設彈壓  
一員猛板芒市二處請設彈壓一員惟隴猛遮三處小小交涉邊案極多並有過耕田  
土輾轉該處彈壓擬請委兼交涉副委員不另支薪辦事較爲靈通等情查該守籌書  
各節尙屬周洽應照所擬辦法遴員委辦其隴猛遮彈壓兼交涉邊案副委員查有楊

春培堪以委充猛板芒市彈壓委員查有楊鴻仁堪以委充是否之處統乞銜核示  
師長根源叩青印

省城軍都督府鈞鑒青篠兩電請設彈壓地點一節覆加考覈隴猛遮共設一員實屬  
未盡妥協昨電黃守籌商該守亦以爲未當前請共設一員係爲樽節經費起見云云  
查源前在騰所陳各節奉鈞府蒸電開擬以南甸爲一縣干崖爲一縣益以蓋西練蓋  
達爲一縣益以蠻允戶臘撒隴川爲一縣猛卯遮放爲一縣芒市猛板爲一縣以上均  
隸騰衝府等因仰見鈞府規畫詳密之至意茲擬將青篠兩電所劃地點改照鈞府前  
電所劃區域辦理除干崖蓋達已設南甸緩設外隴川擬設彈壓委員一員兼充交涉  
副委員仍以楊春培委充猛卯遮放設彈壓委員一員查有周謨堪以委充芒市猛板  
設彈壓委員一員仍以楊鴻仁委充庶與鈞電所指示者相符將來亦便於治理如蒙  
俯准乞併青篠二電核示遵行根源叩青印

爲札飭議覆事照得騰越地方寥闊漢夷雜處原設八卡各配練丁以防緝野匪藉實

邊備其初用意未始不善自後相沿日久百弊叢生若再因循仍舊不惟勢固虛設抑且徒滋流弊是非防範撫綏之道茲擬將八卡卡官概行裁撤改爲彈壓委員併設四員就原有薪水每月給薪水銀十六兩公費銀十二兩凡所用兵丁及筆墨紙張一切各項雜費均在內其分駐地方應擇於滇緬交界騰龍十土司轄境扼要駐紮以資彈壓所有各卡練谷歲入歲出各若干有無存積原領槍枝子藥各項軍裝數目均宜切實清釐呈候核奪札到該守公所即便遵照將上項所擬裁撤卡官改設彈壓委員及應分駐何處清釐練谷槍枝各事宜會同該守公所迅速詳細議覆以憑核辦勿延切切特札右札騰衝府騰衝自治公所

省城軍都督府鈞鑒騰衝邊地舊設八卡分設卡官所以妨奸宄而緝盜賊用意本善惟日久廢弛遂同虛設源前在騰曾飭黃守一併裁撤酌設彈壓四員並飭劃分地點妥籌稟辦頃接黃守陽電稱彈壓名目與各土司所設者相混擬請改爲巡捕駐紮地點擬一駐猴橋黑溫塘居中之盡西一駐隴猛居中之猴壘一駐猛遮居中之蠻滿一



駐隴屬章鳳或遮屬黑山門惟各員薪薄擬就地揀委等語查該守請改彈壓爲巡捕委員尙屬妥協所定區域亦頗扼要除電准照辦並飭就地揀員委充呈報外謹陳乞飭部備案師長根源叩青印

大理李師長鑒青電悉所陳各節均屬妥協應准照辦惟據軍政部呈稱細查所擬分駐地點猴壘與章鳳相隣蠻滿與黑山門亦近地勢尙未適宜擬請改爲一駐蓋西一駐章鳳一駐猛卯之扒坤一駐猛板之蠻牛壩分配較爲停勻等情希即查核辦理并覆都督府元印

大理李師長鑒青電悉據軍政部呈稱查此電請設彈壓委員各地與前電請設巡捕委員各地同在一方既設巡捕又設彈壓未免重複且設彈壓乃改土之始基宜暫避此名以釋土司之疑據軍政部呈稱前後兩電請設各員均在邊地擬專設一項名曰邊務委員除前設之交涉委員仍舊設立一律更名爲邊務委員外尙應添設三員一駐蓋西一駐猛卯一駐蠻牛壩尤爲適宜等情查該部所擬尙屬允當希即查照辦理



員員充任報查都督府刪印

省城軍都督府鈞鑒月密騰屬蓋西一帶外接野夷舊議八卡以爲防制然防之於內而不防之於外就能得力亦祇足杜內地之侵擾無以顧越界之搶劫邊案之交涉日多每歲之賠償無算故議裁併改設巡捕分駐邊裏與彈壓委員用意本不相蒙巡捕之責在緝捕野匪杜其越境兼稽查出境之糧食入境之私鹽彈壓之責在監制土司收其治權以實行邊地之經營權責亦不相侷駐紮地點彈壓則不能不設於土司之治所及控制便利之區巡捕則不能不設於通緬之要道及野匪搶劫之地此其不能牽并者也原定薪水彈壓一員月薪五十兩公費五十元由公支給巡捕一員月薪僅十六兩護兵三名就卡費支給者又不能挹注者也部議專設一項本極劃一惟擬將交涉邊案委員改爲邊務名目外共設三員分駐蓋西云云查交涉邊案委員須經外人認可今既不改職權徒易名目似無取此紛更且與英緬官廳往來非一苟不標出權限亦有誤會之虞至彈壓之設其來已久邊務之名轉是創見將謂土司致疑恐在

彼不在此蓋西本係練地所以防野匪非以制土司猛板蕞爾蠻牛壩亦僻處一隅僅係滇緬交通無以長駕遠馭止以設巡捕員爲宜青電第據黃守電轉未及詳晰敷陳茲謹分別聲明以備衡核應否准照原議設立隴卯遮彈壓兼交涉副委員及芒板彈壓各一員仍照給委之處伏候示遵根源叩篠印

李師長鑒篠寄電并悉彈壓與巡捕權責既不相侔自應分別辦理所請照蒸電分劃區域設隴川彈壓兼交涉副委員一員以楊春培委充猛卯遮放彈壓一員以周謨委充芒市猛板彈壓一員以楊鴻仁委充各節應卽照准并候分飭備案至巡捕委員是否仍設其駐所是否照軍政部議或執事原定地點希卽電復都督府馬印

省城軍都督府鈞鑒馬電敬悉蒙准新添隴川等處彈壓委員遵卽分別委任巡捕委員仍遵照前電設立其駐所亦照部議區分於前日已電飭黃守遴員委充報查矣謹復師長根源叩馬印

李師長鈞鑒寄電奉巡捕委員蓋西委馬春猛板委任遇陞扒坤委李源馬將行任赴

南甸李回永尙未到章鳳擬委楊載仁鈐令辦妥領薪報費應遵辦惟祇銀二十四兩似可免其報銷詠謙叩覆馬印

令案查騰衝府屬各土司現均已設有彈壓委員各員名稱亟宜遵照軍都督府所示區劃另行規定以期一律干崖隴川定名曰干崖彈壓委員隴川彈壓委員戶腊撒兩司地面狹小與蓋達比鄰統由蓋達彈壓委員兼顧仍定名曰蓋達彈壓委員猛卯遮板定名曰卯遮彈壓委員芒市猛板定名芒板彈壓委員除呈咨外合行令知爲此仰該府即便遵照並轉飭所屬各員一體知照此令騰衝府知府黃謙

令案查騰衝府屬各土司地彈壓委員職務紛繁責任重要亟宜由各委員駐紮地方之國民軍就近撥兵十名專歸各委員節制以資調遣而備不虞查蓋達彈壓委員著由第十五營抽撥防兵十名干崖彈壓委員著由第十三營抽撥防兵十名隴川彈壓委員著由第十六營抽撥防兵十名卯遮彈壓委員著由第十六營抽撥防兵五名第十四營抽撥防兵五名共十名芒板彈壓委員著由第十四營抽撥防兵十名各兵之

開除募補統由各該委員分別辦理咨明各管帶轉報備案至於各兵餉銀服裝由各管帶請領咨送各委員轉爲散發以清權限而使稽核除呈報咨令外合行令該鎮查照辦理轉飭各營管帶迅將應撥兵數及軍裝槍械等件造冊送交各委員接收並報查考此令騰越鎮李德泳

令騰衝府屬各土司土地膏沃物產豐饒惟僻處極邊漢夷雜處前清時代視爲甌脫忘皮存毛附之喻存苟安旦夕之心名爲羈縻實則縱任邊備空虛強隣覬覦職是之故非設員管攝不足以資控馭本總司令此次蒞騰曾經分別電請軍都督府蒙准設干崖彈壓委員蓋達彈壓委員隴川彈壓委員猛卯遮放彈壓委員芒市猛板彈壓委員各一員共五員衝均隸屬騰府撤戶腊撒兩司地面狹小與蓋達比鄰統由蓋達彈壓委員兼管當經委任王崇矩充當干崖彈壓委員郎侯泰充當蓋達彈壓委員楊鴻仁充當隴川彈壓委員周謨充當卯遮彈壓委員聶紳文充當芒板彈壓委員每員月薪伍拾兩公費伍拾元並由各該就近國民軍抽撥防兵十名專歸該委員節制調遣



合行通令爲此仰該官廳即便知照此令迤西各道府廳州縣

省城軍都督府鈞鑒頃據騰衝黃護道敬電稱猛卯遮放交涉極多近漸迭起所設彈壓仍請如隴川例兼交涉副委員不另支薪蒙允當照會領事轉知緬官知照隴川彈壓楊委春培極陳身弱不耐烟瘴並稱上無伯叔下無兄弟留此病軀以慰家嚴涕泣辭差情極懇切擬請照准遣差查有前赴各司巡歷之聶中隊長紳文明白穩練任事實心謙前在師部見其出巡時所來稟牘於邊務情形言之多中肯綮卽心識之調委隴川彈壓委員兼交涉副委員必能勝任等語查聶中隊現已升充第七聯第二大隊副長人極明穩能耐勞瘴前曾同赴片馬現復周歷各土司沿邊情形尙能周知處分事理亦頗得當俾任斯職較在軍中尤多裨益楊委現既力辭擬卽改委聶紳文接充其猛卯遮放彈壓兼交涉副委員不另支薪一節事屬可行擬請照准是否乞銜核示遵師長根源叩宥印

呈騰衝黃護道鑒昨接敬電當卽轉呈軍府頃奉東電開卯遮彈壓着准兼交涉副委



員隴川彈壓委員兼交涉副委員准以聶紳文接充等因希卽遵照根源江印

案查騰衝府屬之茨竹大塘明光滇灘四撫夷隘地內之行政事宜及民事訴訟應劃歸龍川江經歷管理以期整頓該撫夷等以後不准擅受民詞干預地方行政以歸劃一除呈報及分別咨令外合行令知仰該府卽便遵照出示曉諭並轉飭該經歷妥慎辦理此令護理迤西道黃謙

呈竊查騰衝各土司曾經電請分別設置彈壓委員蒙准並分別遴員委充呈報各在案惟南甸一司尙未設置茲據該司所屬人民呈請照各司例添設彈壓委員前來查該民等呈詞懇切望治情殷自應照准以免向隅惟查南甸距騰較近其人民亦頗純樸現在財政支絀勿庸另設專員以節糜費凡該土司所屬人民種無漢夷事無鉅細若有一切民刑訴訟案件自陽曆八月初一日起概行劃歸騰衝府管理該土司不得再行收受呈詞但遇有搶劫重案該土司仍有協力緝捕之責至於教育實業諸要政亦由該府督率該土司認真籌款舉辦該土司稍有見聞務宜稟請騰衝府酌核辦理

不得藉故諉卸亦不得侵越權限該司所屬族目及地方土民中查有明白事體熟習地方情形者即各遴選一人委充騰衝府自治公所議員以備諮詢除分別咨令外理合呈請鈞府查核備案此呈雲南軍都督府

案查南甸土司一切行政司法各事務曾經劃歸騰衝府管理並呈咨及分別飭令各在案惟該司地面寥濶所屬蠻允地方查與蓋達緊相連接所有蠻允地段內裁判教育實業及各行政自應撥歸蓋達彈壓委員兼理以期便利而免稽延除呈報及咨令外仰該府即便遵照出示曉諭並轉飭所屬各員一體知照此令騰衝府知府黃謙

照得潞江土司向隸龍陵其裁判權則屬於土司法律若何判決若何皆由該土司自行規定地方有司漠不過問殊屬非是方今民國新造政建共和遐邇人民一視同仁司法機關尤難歧異該土司所屬人民種無論夷漢事無分巨細遇有民刑訴訟自應劃歸龍陵廳管理該土司勿得接收呈詞以清權限至於教育如何整頓實業如何振興亦由該廳督率該土司認真籌款辦理該土司所屬有明白事體熟悉地方情形者

著遴選一二人委充龍陵自治公所議員以備諮詢除呈報軍都督府及咨令外合行令知爲此仰該丞即便遵照凡潞江土司所屬一切民刑詞訟案件統由該丞認真審辦並出示宣布俾衆週知至於輕微案件兼顧難周可令該廳分防巡檢就近代爲審理以免稽延並將辦理情形隨時呈報切切此令龍陵同知張鑑安

呈悉所陳各節類能審察情勢默揣機宜而末段指陳危險一條尤有深識遠慮仰候轉陳軍都督府核辦可也摘由批附原呈

卯遮彈壓兼交涉副委員周謨呈蓋聞事有萬端非解決本根不足以收治理機有萬變非統籌全局不足以固根基補苴非救時之政破壞即完全之徵委員奉差幾二月矣孜孜矻矻不敢一日或懈常此以往未始不可收委任之功然考查民情實事求是騰衝十土司非統籌全局解決本根萬不能收美滿完全之效者謹擬三難四易一危險之政見爲憲台呈之爲治之道首先教養然無養何以有教各司地之民困亟矣擺夷居平壩漢人住高山居平壩者懶惰自甘祇知謀朝不顧保夕漢人雖有知識奈不

能處瘴視平壩爲畏途但衣食所迫亦多有冒險進取者無如土司定制不準賣田雖百般手段其如一片肥壤何坐此之故一切居民均成消極主義擺夷沃土失之不才漢人仰食守株坐困卯遮芒猛大小隴川無不如是昔商鞅變井田而阡陌一洗封建之制秦民始以智力相尙國因以強故不除各司世土之例則滿夷皆偷惰自安不能振理民困益深此其難者一土司定例祇知剝民而不知愛民奴隸牛馬幾成天職每歲正供漢人分上中下三等上戶一兩二錢夫役八十名租豆五柳米三柳洋煙八十兩此項近改名曰山租中戶三分之二下戶減等擺夷則每歲所入谷米必納三分之一年年拜冬拜節點卯幕東師爺銀兩每戶或一二兩兩餘不等此皆歲額所定外有特別婚嫁建造等項不在此例尤有可畏者每逢攤派不論田地多寡祇憑銀錢有無近年居民不堪其累全家遷徙英地者不下數千戶爲淵驅魚爲叢驅爵雖云木那各地準民種煙故歸之者衆然非各司剝削當不至此故不蘇民之重賦則流亡日多空有土地此其難者二十司地面夷種雖多但阿昌純樸崩竜良善獯獯胆小均不能爲民害爲害最



烈者實爲野人屋據高岩官長極毒之劫掠良民爲事干厓蓋達雖間有之但不甚勝若南甸隴川戶臘撒之南遮放猛卯之北橫亘數百里大嶺直達緬界爲野人萃聚之區各司住近居民不時受其搶擄自去歲清兵征豬腰街失利迄今猖獗愈甚耕田畚夫稍遠村寨即被搶掠又遮放南與南坎交界之畹丁河邊野人亦衆各司互相控告由多野人過界而起其實土司亦失安撫之策故不去野人之害則民不聊生墾荒亦無從下手此其難者三土民苦虐政久矣撫我則后虐我則仇民心向背何常近來細調加查漢人思漢官故不待言即夷民亦知漢官之善群思歸化因其勢而利導之易如反掌耳但十司相連牽一髮動全身非通盤籌畫不能收功查騰衝府十司地段共紮國民軍四營若以四營兵力分駐芒市遮放猛卯隴川更以駐騰新軍分三隊移南甸干厓蓋達俟乾冬候密知各營管帶迫令各司改流其有自知公理服從命令者予以湯沐數邑如內地各司者然否則鋤而去之以目下之考查除南甸干厓遮放猛卯稍有兵力餘則摧枯拉朽耳一舉動之勞而出土民於水火此改流之易一也各司既



去建設宜速南干蓋三司稍近內地平壤亦堪久處可設州縣三芒市遮放猛板瘴毒極烈平地不能常居必擇適宜之處而三脚岩在三司之中清涼可住彰鳳街又在猛卯隴川戶臘撒之中爲漢人叢聚之地二處各設一州縣統計十司共五州縣於冬春兩季趕造監衙一面召集各寨頭人予以功牌委狀一面清理戶口安集貧民至次年冬春民心大定將田畝陋丈各給執照準其買賣招來遠人各給荒土一切實業教育次第講求此善後之芻二也滿清時左宗棠開闢新疆歲費國帑數十萬終無大益故後人每引以爲戒即今言邊事動借經費爲辭雲南於各土司亦何獨不然是皆於內局情形未經審查故爲老成持重之談雲南於十司不改土則已設一旦改土歸流則以十司之欺治十司之地不必外來分文但見其盈不見其絀也南甸千厓蓋達物富民殷不必論矣卽以遮放言漢人居山者分四叢戶口約一千八九百戶擺夷五畝亦不下二千戶共三千八九百戶每戶極少以一兩五錢論

此不過土司  
五分之一耳

每年可得五千

八百餘金由龍陵出新街每畝三錢五分之崗頭銀年終亦不下二千餘金遮放在各

司中較之芒市猛卯隴川貧富相懸不啻霄壤進款猶若是則他司可知五州縣之費所出幾何目下故不必需別來之款兩年後更當有十數萬金供獻滇中作整頓一切之費是皆實在確情此經費之易三也蓋達猛卯隴川遮放各司與英界毗連一旦改流恐起交涉事件此人人所慮但我於各司地面所紮兵丁均係嚴加約束百姓一草一木且不令傷何有於外人之事其或者事當臨機總不能如初心所擬可先與駐騰領事秘密訂約我置我官我濟我政並於各口要隘嚴防土人生事自能消患未然卽萬一小有交涉亦可隨機應付總不至釀起兵端此交涉之易四也其所謂危險一者何各司地自去歲反正後百姓蠢蠢欲動皆思脫去土籍故各司日夜隄防以市恩小民然其所畏者不在土民而在漢官近來土司常相與言曰漢官不時差人測我地圖查我戶口又設各處委員非欲謀我而何其黠者固思蓄銳養精其弱者亦不甘束手待斃買槍製器時有所聞若不乘其羽毛未豐速加剪裁遲之又久則彼不受彈壓之侵其主權必挺而走險與英暗連是我處於被動地位縱竭全力亦不能如今日之完

美况又有失地失民禍結兵連之事乎所謂一危險者此也以上各項均係實心調查無一虛語若四易既行三難自迎刃而解所謂一危險者亦自冰消十司已去則雲龍順寧各司亦易爲力矣既不勞大兵復不動大款如不以爲多事更祈轉知迤西道及騰衝府蓋事關機密各處均未上有呈文即騰真起稿均由自己無第二人得與者蠻煙瘴雨瘁面驚心遙望行轅不勝戀戀所有情形理合呈明尙希俯賜查核施行此呈雲南陸軍第二師師長李周謨呈

案查保山縣屬之十五喧曾經添設經歷一員駐紮上江業經委員著理在案茲查練地土司與十五喧毗連該土司一切行政及裁判各權自應撥歸十五喧經歷管理該土司以後不得擅受民詞以歸劃一除呈報及分別咨令外合行令知仰該府即便遵照出示曉諭並轉飭該經歷妥慎辦理此令永昌府知府由雲龍

省城軍政部鑒羅漢彩現已來騰當將前電屬查各節飭令明白具覆茲據稟稱前在耿馬收繳緝私哨弁槍碼當同罕土司點交楊載仁移交順甯李協有該哨兵丁出具

收字存李協處可據鹽務銀兩并未經手此外所到之處並未索取民間一草一木李協及耿馬土司均可質詢如有絲毫侵擾請按軍律治罪其布告宣言等件係按照革命方略錄出張貼以昭大義而曉羣疑假託軍政府命令之誣想係由此而生溯自前歲由黃克強呂志伊發與方略去秋接杜韓甫函謂滇將舉義沿邊鄰英亟須安撫迨漢彩到耿馬時道路僻遠尙未獲見反正之宣告是以辦理一切不能不照方略所載施行後聞各屬反正卽行蹙回內地冀以沿邊情形報告軍府楊載仁到耿後漢彩卽於彼時起程經順出永至楊所爲如何並不知悉等情核與順甯李協來電所言相同自屬可信查羅漢彩奔走黨事歷有年所艱險危難靡不備嘗在暹羅大山一帶聯絡運動毀其資財至二三萬金實吾黨所罕覩杜韓甫等身預其事言之最詳此次在耿馬舉動亦極純正方道電稟未免厚誣且其人尤誠樸似不能棄置不用渠於西南各土司情形最爲熟習擬派充順甯府屬耿馬猛猛等處安撫委員以資綏輯且爲將來經營邊事之備如何之處仍希示覆並請代呈軍府爲盼根源叩敬印



趙巡按李師長鑒篠奉刪電敬悉昨據益香井飛報有羅漢彩楊載福率七八十人由麻栗壩前來芟稱羅遇溫奉軍府命令巡查勒令緝私呈繳槍械號夜並紮鹽井發給雙餉等情已派兵馳往查緝如係匪徒假冒立予痛剿現接景東蔡丞出報地方頗安靜惟蘇三保等私開已封之大井前已派兵前往會同地方官查辦未據覆報既有此等匪類地方實屬多事請飭林署丞迅速赴任爲盼宏綸叩巧印

李師長鑒月密養電悉前據迤南方道等電稟羅漢彩楊載仁帶兵赴耿馬勒繳槍枝鹽課等情已電請尊處查辦今尊電謂其人誠樸可用熟悉邊情該羅漢彩與耿馬土司來稟亦力稱保護地方是方道等電稟未足盡信該羅漢彩在耿馬舉動究竟是否純正又勒繳槍枝鹽課若干請卽查明核辦如果宗旨正大即亦不必苛求致傷同氣軍政部庚印

省城軍都督府鈞鑒據永昌由守稟稱永屬孟定土司向歸府管轄惟查該土司與永康州相鄰近距永昌城十站甚爲寫遠考察不易控御尤難擬請將該土司改歸永康



州直接管轄知府仍隨時監督情形較爲便利而遇事庶無扞格等情查該守所陳各節似屬可行祈酌核示遵師長根源叩庚印

李師長鑒庚電悉孟定改隸永康希卽照辦都督府政眞印

一件取銷十二關土司由

批呈悉土司苛虐幾成習慣當茲共和時代凡官吏之罔利虐民者皆應放逐而創懲之何得任彼土司土目等酷索浮收誅求無厭致良民受其擾害查代辦十二關土司李丁氏前以伊夫李增祿故後其子年幼未襲暫以該氏代辦乃李丁氏輒敢任用非人縱容土役濫刑搥索控案纍纍經前清李督批行大理府集訊明確詳准將一切派歛規費悉除出示泐石永遠嚴禁該代辦不自悔艾省控圖翻復乘反正之際由省回縣假勢招搖冒稱軍府准其索取舊規遣派土目李清等向土民勒收門牌錢火塘錢農務結酒結店結各項錢文其繳收土糧於定章每升收錢七十文外復加徵浮收多少不等迭經府縣嚴行查禁另將已收者退還乃竟估抗不遵更率其土族土目等人

將前案稟定之碑文打毀擲棄迹其貪橫刁狡之狀實爲法所不容現卽將該代辦明正典刑亦屬罪由自取本師長姑念該氏乃無知婦女習染從前土司虐待土民之事不知安分守法妄思剝民自肥其所用之土目人等又皆稔惡之徒自必怙勢作威層層搯詐以該代辦爲聚斂叢怨之地而該代辦扭於舊規率獸食人尙復屢次來轅蒙混呈控其行爲雖可誅其愚黯亦可憫特是一切橫征暴斂不爲掃除而廓清之則擾累於無民終不能拔本塞源絕其積弊且該李丁氏多行不義若再任其殘民以逞必將爲地方積怨深恐伊母子終不能善自保全本師長爲地方計仍爲該土司計應飭雲南縣將該十二關長官土司滿清印旨追出呈繳銷毀一應所管糧田悉由地方官督同正紳照額丈量歸該縣照章征收報解以杜其浮收之害該土司著爲雲南縣土著齊民一例看待從前十二關土司名目永遠取銷尙餘山地庄租准其酌量提撥以爲該母子養贍仍由官經征按季給領前所苛派之門牌大塘等項結錢嚴令禁革違卽重懲土目李清等如查實有不法情事卽拿獲解送來轅訊明懲辦所有該土司

經管之學務實業等項應由該縣督同自治員紳認真經理咸與維新以示拊循而昭激勸除呈報并分別咨行外希即遵照出示泐石俾衆周知并將遵批辦理情形迅速通報查考切切勿延詞粘抄發批行雲南縣知縣暨自治公所

案據蘭州土舍羅梧秀呈請將蘭州改流一案查蘭州開闢自明土地狹小共有三約半至前清雍正即將各約田地升科納糧惟籽粒麻布約開墾在後未經報解年收地利百餘金概歸土舍收用茲據該土舍稱蘭州三約半田糧回亂以後土民隱匿不符原額麗縣責成土舍土舍無憑追究每年土舍湏代土民賠墊五十餘金懇請將三約半改歸麗縣管理其民刑訴訟案件概歸麗縣直接收受審理土舍僅守滄江邊之籽粒麻布約每年入款百餘金併前改爲公件以賠墊蘭州約錢糧未敷之五十餘金共百五十餘金暫懇准其照舊收用此係爲融化漢夷以固邊圉起見自應照准惟蘭州三約半既已改流滄江籽粒麻布約尙沿舊制管轄既不劃一治理必多困難若飭將籽粒麻布約一併改流則該土舍無地可守無田可食雖無意外之虞殊非懷遠之道

茲或將該土舍所管各約概行劃歸麗縣另設一蘭州分防巡檢駐紮滄江邊以資佐理土舍名目飭其取銷改爲奉祀官年撥奉祀銀若干兩或田若干畝歸該奉祀官永遠世守該土舍既已免催征之苦復得享共和之福諒必心悅樂從其中有無窒碍著由該府會同前任姚守確查妥議逕稟軍府酌核辦理該土舍羅梧秀深明大義辦事誠實此次隨同殲邊任景兩委員經營獾狽不辭勞苦收撫多寨異常出力深堪嘉尚應卽存記彙請軍府從優獎給至拊呈稱大乍足老古甸等村盜風甚熾剗刦爲生亦應嚴密緝捕以除根株爲此令仰該府卽便遵照妥議稟辦原呈併發此令麗江府知府熊廷權

省城軍都督府鈞鑒騰衝沿邊野夷自西南蜿蜒而下無慮數百寨蓋滇緬之疆索西南之屏蔽也歷年以來匪微未加經營抑且罕知綏輯聲教所弗訖文告所不通流官以其僻遠或漫以甌脫視之土司以其犷悍或竟以寇讎遇之靳其土田奪其生計剽勁之性往往劫掠爲生內擾熟夷外釀邊案關係良非淺鮮源等究心邊事常議欲資



以墾荒裕其生計教以識字開其智識用紓邊患而固藩籬惟茲事體大且夕難期念惟先行派員前往巡視加意撫循宣布德意令受約束導以內嚮戢其野心然後生聚教訓可得而徐議也茲特選派記名管帶李遇順爲正委員記名幫帶李源張壽測繪員明士仲朱文炳爲副委員由十五營撥兵兩棚帶同前往循古勇迤邐而南逐寨召集野夷頭目妥爲安撫剴切開導諭令安分謀生勿得越界滋事仍分別犒賞取具木刻呈案每員除照支原薪外每日發差費三角日兵日給費七仙除委辦外謹電陳明師長根源巡按藩同叩微印

爲札飭嚴緝事照得蠻允蓋達一帶野夷土匪結黨成羣動輒搶擄燒殺習以爲常若不嚴緝懲辦殊不足以張法紀而保治安茲查有紳士劉開信老成諳練辦事勤能合行札飭爲此札仰該紳遵照迅卽會同劉管帶品三隨時嚴緝蠻允蓋達一帶巨匪拿獲解轅聽候懲辦毋稍滋擾疎縱是爲至要切切特札札蠻允劉紳開信准此爲劄付事照得沿邊各土司土職世守其疆以固牧圉追維受職之始各有屏衛之勞

今者大業重光宗邦新造仍俾繼承於勿墜用綏保惠於無窮茲特發給劄付並將奉到軍都督府頒發印信隨文頒給以昭信守除呈報軍都督府暨咨軍政部外合行發給爲此仰該司該土職遵照恪供舊職慎固封疆用副任畀之至意仍將奉到劄付及啟用新印日期具報查考所有該司該土職以前所領舊印並隨文封呈龍陵廳永昌府騰衝府雲龍州代爲繳銷須至劄付者計發新印一顆右給騰衝府遮放副宣撫司芒市安撫司腊撒長官司猛卯安撫司隴川宣撫司干崖宣撫司戶撒爲官司猛板土千總雲龍州六庫土千總老窩土千總保山縣卯照土千總等梗土千總魯掌土千總練地土巡捕龍陵廳潞江安撫司

爲命令事照得云云並將奉到軍都督府頒發印信隨文發由該州府廳轉發各該土司土

職祇領收執啟用以昭信守其各該土司土職以前所領舊印並飭隨文繳由該州府廳

繳除分別呈報咨行外爲此命令仰該州府廳即便遵照此令計發劄付扣印信一顆

達土司現因爭職沐辦承襲應候辦理承襲後再行頒發右令永昌府騰衝府龍陵

廳雲龍州

爲呈報事案據南甸土司刀樾椿稟稱竊早司先祖本南京應天府上元龔姓名宗於前明洪武十五年充百夫長隨沐國公英征雲南改名猛功遷騰衝千夫長後駐防南甸始賜姓刀查其賜姓之由因南方諸夷服從刀姓故沿邊各土司始有此姓之稱也卑司先輩爲國守土已傳二十八世閱五百六十餘年所有屬境荒地概已開闢夷民已向化服從茲逢義軍恢復民國成立實我四萬萬同胞幸福無量當此文明進均化之初邊地諸夷均已一律同化從前恩賜姓氏今應改歸原姓以復漢籍合無仰懇憲恩賞准復姓龔民以宗先人之原姓而使邊夷效法亦進化於文明如蒙俞允不特卑司閭族人等感戴德澤卽將來邊民皆望風而進化矣是否有當伏乞衡核批示祇遵等情據此查該土司之祖龔宗於前明洪武年間隨沐國公征撫滇南積功遷騰衝千夫長駐防南甸改賜刀姓所以威服諸夷今見祖國光復呈請改復漢姓前來實屬不忘本原深明大義其見解實出於各土司之上當經批准并轉飭該土司族同人等一

體復姓在案除咨明軍政部外理合具文呈報鈞府查核備案須至呈者右呈雲南軍都督府蔡

省城軍都督府鈞鑒片密干崖土司刀安仁前在騰城索餉索械並勒派各土司數萬金昨經密陳在案頃復搜索得該土司命令耿馬文一件略稱本都督與張都督同時起義各擔義務各司應向本都督府填寫誓表送交本都督府所有應完錢糧各欸即上歸各屬民部委員等語並分給孟定灣甸耿馬夷文函三件誓表格式各一紙囑釋文義大約均係興夷滅漢帝制自爲等意除將原件郵呈外合行電稟乞賜查核飭將刀安仁扣留在省監禁聽候查辦根源謹叩 印

省城軍都督府鈞鑒片密前奉電飭補陳刀安仁罪狀因與刀上達案有關擬俟上達解到研訊詳情以資印証故未卽覆刀上達昨經解案所供主使各情已詳前電茲將前後各罪狀條列如下騰衝反正之始該土司附會革命得入騰城遂踞道署自稱都督強索銀萬餘兩槍枝三百餘桿並勒派各土司及蠻允弄璋等處商號銀二萬餘兩



槍經嚴飭繳還銀則莫可究詰罪一又用雲南都督名稱徧發命令於西南沿邊各土司內均附有夷文函件譯其意義率皆興夷滅漢帝制自爲鼓煽獨立幾壞大局前曾搜獲所給孟定灣甸耿馬各文件呈送在案罪二刀上達被釋後寄居南甸該土司許其復職教其肇亂所發命令書可據原文昨經電陳罪三擅行刊發軍用票在騰永一帶勒令行使查所發出數目約合銀三萬餘兩市面陷於恐慌財政蒙其弊害罪四又聞有秦力山王可石兩人皆南洋一帶革命黨員前在該司地方被其暗行戕害王可石屍首亦不知棄置何所惟事遠難稽未便據以定讞然秋帆子和往來其間幾遭毒手其事固不盡誣再查該土司淫亂苛暴尤難擢髮搜求夷女以充下乘者百數悉報宗親豪奪民婦倫彝淪喪黎庶吞聲穢德彰聞人道斯絕科歛無度徵發不時民困誅求歲徙於緬者無慮數百家往歲嘗至日本稱獨立國自號干崖王東國喧傳報章騰說歸國以後遂蓄異圖私購軍械野心已見滋蔓可虞又私訂口人潛勘礦產自東來者相屬於道退役軍校亦雜其間聽其窺測地形密圖要塞尋以虧負薪資口人控逆

有案示人利器壞我國防厥罪尤大雖微今日之鯨張亦難養癰以遺患應請銜核電請中央政府迅予懲辦以除亂本而固邊封候示遵根源叩巧印

### 怒獄

雲南軍都督府鈞鑒滇西北隅潞江以外地極邊荒土舍居民半不歸化間有隸屬中國者羈縻而已進至球江及恩梅開江之外則更孤懸絕徼漢土人等足跡罕到其地面積寥闊上通藏衛中連印度下接緬甸實爲我沿邊一帶藩籬外人耽視已非一日從前法親王某及教士等先後由此取道至印均以糧乏路絕而返片馬之役源命潘萬成王秉鈞等員冒險深入所經各地撫摩煦育受撫者百十餘寨咸泐石紀念若再加以經營設官分域開墾通商更以軍隊鎮之必皆望風皈附源嘗深念及此在軍政部時曾經電飭麗維統領麗江府派員調查竊恐未能得力此次到榆携有景紹武段振基及任宗照等適值騰永軍事漸定擬即授以方略分遣前往應如何籌備設施俟該員等到彼地後攷察確寔稟覆再分別次第辦理是否特先電乞示遵師長根源謹

叩元印

趙巡按李師長鑒元電悉慎邊遼闊逼處強隣南界早經劃分尙無異議西北境既邊遠界限未清履勘數回瘴地千里皆緣視爲邊荒溥不置意致啟戎心若非及早經營不特土舍居民永淪榛莽且外人耽視寢撤藩籬日緊一日去歲片馬之役已爲前鑒印公規模宏遠熟習邊情將來鎮撫綏緝使皆回面內響較之率師援蜀其功尤偉尊意以爲如何鏘諫印

爲札委事照得潞球兩江以外恩梅開江以內各夷地方或受土司羈縻或則自爲部落滿清時代視爲甌脫從未加以經營以致界務輻輳夷心渙散實無以保邊地而固國防現在大局已定亟應派員分投前往逐寨撫綏攷察情形籌辦一切查有第七聯中隊長任宗熙勇於任事熟習邊情堪以委充籌辦邊務委員長着暫准給協都尉銜第一聯記名中隊長景紹武熟習夷情明白耐苦堪以委充籌辦邊務副委員長着暫准加正校尉銜林敬儒趙嘉賓楊建中帥崇興堪以委充邊務委員除呈報咨行外合

行札委札到該員即便遵照尅日馳往妥爲辦理同行准撥西防國民軍第一營中哨全哨兵丁號護兵共八十四名每名發給九餉毛瑟槍一桿各配子彈二百顆交該委員管帶調遣沿途固當嚴爲約束一至怒隸各地尤不得稍形滋擾致失夷心該任委員薪水准照減成新章大隊長支給惟無公費景副委員薪水准照中隊長支給邊務委員薪水准照小隊長支給該委員等准各給騎馬一匹每匹月給馬乾銀三兩官兵及一切駝馬准給十二匹每匹每日給腳價銀二錢五分差盤中級官每日二角五仙次級官一角五仙目兵七仙並准每月領筆墨紙張以及一切撫綏零星公費銀拾兩以後即分別照領並准各預支三個月薪餉以利進行一應籌備設施各事宜務須悉心計畫分別次第隨時條陳請示辦理毋稍疏忽致負委任切切特札右札委籌辦邊務委員任宗熙副委員景紹武邊務委員趙嘉賓林敬儒楊建中帥崇興准此

爲札飭遵辦事照得經營怒隸兩江撫綏各夷籌辦邊務各事宜當經本總司令官電准委派任宗熙充籌辦邊務委員長准給協都尉銜景紹武委充副委員長准給正校



尉銜率同各委員前往辦理嗣因籌辦事繁復添委何澤遠充當副委員長幫同辦理各在案惟該員此次應辦事宜應卽詳爲規定俾有遵循并據該員繕具冊摺呈請前來查該員仍照案准加予正校尉銜月薪照中隊長減成薪水發給每日差盤照給一角五仙乘馬一匹月給馬乾掌韁銀三兩准隨帶目兵三十名以二十名作爲目兵以十名作爲各項商人匠役所有該兵等月餉統照國民軍餉章支給每日每名差盤各給七仙伙夫准用三名照防營餉章支領駝馬四匹每馬每日發價銀貳錢五分現准預支三箇月薪餉將來由維西姜兼帶營兵餉內撥發並准借開辦商務資本銀一千兩將來經營起色仍照數還繳歸款軍裝一項准發九餉毛瑟槍二十桿子彈二千顆白布帳房三籠銅鑼鍋四口除呈報軍都督府及咨明行知外合行札飭札到該員卽便遵照分別具領至一應籌備邊務商業工鑛各事宜務須商承任委員長宗熙會同副委員長景紹武悉心計畫妥爲酌籌隨時條陳請示辦理毋稍疏忽以及縱兵滋擾致干重究并將隨帶目兵及各項匠役花名造冊呈報查考摺冊發還切切特札札籌

辦怒猓邊務副委員長何澤遠

爲札委事照得怒猓兩江以外恩梅開江以內各夷地方向皆視爲甌脫當經本總司令官電明軍都督府札委任隊長宗熙充正委員長景紹武充副委員長率領各委員及國民軍一哨分投怒猓各處逐寨撫綏攷察情形籌辦一切事宜茲查有蘭州土舍羅梧秀熟習該處情形堪以派充邊務委員以資贊助合行札委爲此札仰該委員卽便遵照前往聽籌辦邊務任委員長宗熙節制襄辦一切勿稍疏忽致負委任切切特札右札委邊務委員羅梧秀准此

爲札委事照得怒猓兩江以外恩梅開江以內各夷地方昨經本總司令官電明軍都督府札委任隊長宗熙充正委員長景紹武何澤遠充副委員長率領各委員及國民軍百二十名分投怒猓各處逐寨撫綏攷查情形籌辦一切乃宜復添委蘭州土舍羅梧秀充當委員各在案茲查有六庫土司段浩熟習邊情辦事諳練卯照土司段承蔭俱堪委充委員隨同辦理以資贊助合行札委爲此札仰該員卽便遵照會同正副委

員長妥爲協商認真辦理毋負委任切切特札札委充籌辦怒隸邊務委員六庫土司段浩卯照土司段承蔭准此

爲札飭遵辦事照得本師長現委任委員宗熙景副委員紹武酌帶員生兵丁前往怒隸兩夷地方籌辦邊務非得附近地方文武官吏援助及土司土目嚮導斷難迅赴事機該附近文武官吏及土弁所屬地方均與潞隸江外野夷毗連倘能協力經營外可以固藩籬內可以享治安尤爲該附近文武官吏及土弁莫大之利除分飭外合行札飭札到該附近文武官吏及土弁即便遵照俟任景兩委員到時務須隨時援助嚮導並揀派明白土目隨同前往毋稍諉卸疏誤切切特札右札老窩蘭州卯照六庫土弁卯照土弁維西廳中甸廳麗江府雲龍州麗維統領維西協阿墩子委員

李師長鑒員率退兵於初五日到鶴交諸父兄管率員折維與任景二君議任由中路富川進景由下路兔莪進員由上路葛蒲桶進雪化即分道進發員等均體師長德意化寺諸夷一切辦法均遵命令實行委員何澤遠廿六日稟

麗江姚知府轉拓邊副委員景紹武覽本日接前月皓電悉該員已抵兔峨慰甚匪黨和務德和庫發二犯持弩拒捕槍斃亦屬正辦喇古甸賊黨甚衆所請派兵助剿之處已電飭麗江姚守查明稟辦矣此復總司令部元印

麗江姚知府覽頃據拓邊副委員景紹武前月皓電稱學員抵兔峨後連日雨雪實難登山進怒於三月初八日學員命兵往獅井護送公文在黑水河地方被賊搶掠一切軍衣盡皆脫去後據喇古甸團日等稟報余經和久爲賊首學員覆查無異並尋出贓物數件乃派兵緝拿該賊黨和務德及次子和庫發尙敢持弩拒捕被緝捕軍用槍擊斃學員細查喇古甸乃賊巢所聚黨羽甚衆又據蘭州土舍稟稱該寨不服王化常出搶掠若不即行勦除將來滄江一帶受害非淺請派兵勦除以免賊黨漸增俟開闢之後一切運輸方無危險等語查喇古甸賊匪是否衆多應否派兵助勦希即就近查明稟候核辦總司令部元印

總司令憲鈞鑒元電謹悉查滄怒夷衆散爲民聚爲盜頭目庇縱積習百年均在洞鑿



元日接景委移知拒斃賊匪等情並奉飭查明稟辦等因此次並委進富川尙未來信景委進兎峨茲請兵助勦雖屬正當相距署府十站以外情勢萬難兼顧可否飭景委暫住兎峨鎮懾不求速效以招撫爲進取如難就緒再議重兵勦辦若輕入怒地兵力單薄轉涉危險伏乞衡核示遵春魁稟奉印

狀照得辦事手續必期敏活而後無扞格之虞籌畫邊情尤貴單純而後收便捷之效本師長前委任宗熙等前往怒隸一帶撫綏各夷并撥西防國民軍第一營中哨目兵八十四名爲拓邊隊歸該委員管帶調遣繼復添委何澤遠充副委員長協同任委員等籌辦一切准帶兵二十名匠役十名月餉照國民軍餉章支領並各准預支薪餉三月惟何委員外借資本千金以興辦商務後仍如數繳還業經分別呈報及咨令各在案茲查該員等現均深入夷地交通不便遇事皆請示本部非特往返需時抑且情形隔閡固得審慎周詳之益亦多牽制周轉之嫌查麗江府姚守老成明練熟悉邊情該處距離怒隸較爲捷近着委該守兼充籌辦怒隸邊務監督凡該委員等遇有請示事

件及辦理情形隨時直接稟報該守酌核辦理所有該委員等預領薪餉及支用數目均宜核實造具詳細清冊呈由該守查核轉報核銷至三月分以後該員等應領薪餉統歸該守由榆局領發以歸劃一而便稽攷除分別令知及呈咨外合行給狀爲此仰該府即便遵照辦理此狀兼充籌辦懲獄邊務監督麗江府知府姚春魁

急麗江孫統領姚太守鑒冬電悉帥崇興所報是否屬實希卽迅派委員前往偵察確實稟復核辦來電所籌各節甚爲周密惟夷民兇悍成性非厚兵力不足以資抵禦查國民軍第九營目兵多係劍人當經遣散已於昨日回籍該守可卽稟陳趙巡按會商該營楊管鍾驥挑選精壯耐勞者編成一哨不足再由麗劍土箸募補該哨共設哨官長各一員由該統領擇選得力者交該守暫行給狀俟成軍後卽飭開拔隨同景委兼程前往探查任委消息相機辦理如任委被害屬實卽飭痛行剿辦以伸法紀而警兇頑否則以半哨撥歸任委以半哨撥歸景委直接節制並飭率領分頭前進該哨應需之軍服槍彈帳棚鑼鍋等件及餉銀已飭餉局配齊派弁於歌日解交該守轉發該哨

開往到該地後即將所撥喇井防兵兩棚撤回原處並將成軍開拔各日期具報查考  
楊管本日由榆起程回劍並聞根源江印

省城軍都督府鈞鑒藏亂蔓延邊勢日亟防維籌備均關緊要麗江一缺非得幹略兼  
濟洞悉邊情者斷難勝任熊守廷權應懇迅速委定飭卽尅日起程赴任勿任諉謝以  
重邊任姚守春魁跋曆中維情形最熟前經加委兼任籌辦怒隸邊務監督現在迭電  
辭職均以願專任經營邊務爲請查滇西北界迭生軻轄今竟駸駸東漸皆由視爲甌  
脫坐啟狡焉思逞之心近今邊警頻聞夷性愚獷不亟綏輯蠢動可虞經營之方對內  
對外均無可緩擬俟姚守卸事後卽改委籌辦怒隸邊務總辦以重責權每月薪水六  
十兩公費八十兩以資辦公前派籌辦怒隸正副委員長任宗熙景紹武何澤遠及各  
委員卽歸該總辦指揮所有籌辦事宜均由督率辦理其石登阿墩子彈壓委員及阿  
墩土勇並聽節制調遣以期辦事靈活免礙進行蔣仁孝報効銀壹萬元經電奉准作  
爲經營北界或改土經費擬卽將此項銀兩發交該總辦作爲基本金逐漸興辦怒隸

地方商業實業收效之期約以五年爲限仍予嚴定限制不得虧折本金如有虧耗分文即惟該總辦是問如蒙俞允再飭妥擬章程核定舉辦其餘一切規畫並俟續陳源爲殖邊固圉起見是否有當伏候衡核示遵師長根源叩冬印

省城軍都督府鈞鑒姚守春魁奉准委任籌辦怒隸邊務總辦當即轉飭遵照預爲籌畫俟熊守到任交替後即行着手辦理惟查茲事體大前電所陳各節外尙有應行規定者現除任景何各委及石登阿墩彈壓土勇均歸節制調遣外擬再將保山屬之等梗魯掌卯照三土司雲龍州屬之六庫老窩兩土司麗江縣屬之蘭州土司並維西甸兩屬所轄之各土職均歸該總辦直接管理調遣庶事權統一呼應靈通其拓邊隊僅一哨零三十名不敷分布擬即由該總辦督同各委員妥爲添募編足一營並更名殖邊隊兵額餉糈皆照國民軍章制辦理惟編配應特別規定共分四隊以一哨歸任宗熙帶領名爲第一殖邊隊以一哨歸景紹武帶領名爲第二殖邊隊以三棚歸何澤遠帶領名爲第三殖邊隊以五棚歸該總辦帶領名爲第四殖邊隊其管帶哨官長名



日均不設置並准酌量於各隊中以定額四分之一招用商販工匠補充惟實在兵員須足四分之三此項人員除正副委員長三員委員四員外並准酌帶差遣員三員正目委員長及各委員薪水照舊支給差遣員每員月支薪水十二兩在行動時員兵旅費照國民軍新章辦理馬乾馬脚銀照舊定數目辦理該總辦往來公電准於公費外另行實報核銷該總辦駐在地點不必限定一處俾便往來攷察該總辦職權內辦理一切悉聽便宜行事又查阿墩土勇向聞有缺空尅扣情弊勇丁尤爲疲弱應俟該總辦到彼後認真查攷應否淘汰改募以及可否裁減統由該總辦酌量稟辦總期有一勇得一勇之用再懃狷地方險塞人性愚曠經營所至尤湏有兵力策應孫統領熱心邊事熟習情形擬請委兼會辦不另支薪以資協助該總辦委員等關防委狀卽由源分別頒發給換呈報查考如何之處伏候核示遵行師長根源叩虞印

李師長鑒月密虞電悉所請募足拓邊隊四隊及添設差遣員擬定餉章旅費請委孫統領兼充會辦各節均可照准惟殖邊隊不必另募可由國民軍內抽撥一營編定調

遣雲龍保山以西各地已與英國之遠征隊接近該總辦經營地點自以獐球西北部爲最宜所請直接調遣登梗魯掌卯照及六庫老窩各土司慮滋疑忌應勿庸議至於籌畫西藏辦法已電京請示由維西茶經馬必立之間特闢新路經絡翁以達拉薩應如何先行派員偵測維西出口路線以便着手之處希酌核轉飭姚孫辦理先此電復並候令行知照都督府刪印

省城軍都督府鈞鑒月密刪電奉悉偵測維藏路線源處現無此項人員應請由省揀派經具庚電陳明既有偵測人員再選本地土人作爲鄉導始足以資開鑿而利軍行殖邊隊原有一哨係奉准由第一營撥派交任宗熙景紹武帶往後又募有三十名交何澤遠帶往迨聞任委遇險帥排長求援甚急電准由第九營揀留一哨往援共計兩哨零三十名擬再由第九營挑留五十名卽足一營之數該隊雖獨立成爲一營而兵丁皆由第一營分撥第九營挑留集合而成並未另募現在西防兵力單薄已極此外無可抽撥近見餉源奇絀節節收縮實不欲再增一兵多糜一餉前電請將各土司歸

該總辦調遣原期辦事敏活鈞電謨慮深遠謹當遵辦惟經營所至其資於土司者甚多擬申明附近土司有事應受該總辦指揮俾資呼應如何之處仍候核示以便轉飭遵辦根源叩鈇印

大理李師長鑒鈇電悉前據號電當經政謀兩廳核議殖邊隊應抽撥國民軍不必另募茲既由第九營內汰留併第一營分撥之哨足成一營應卽照辦附近土司并准歸姚總辦指揮俾呼應靈捷希飭遵至偵探維藏路綫人員已飭酌派赴榆矣都督府勘印

麗江姚守覽文電悉籌慮各節均極周妥應行補募五十名卽俟交卸後再行添募基本金存關生息足昭審慎惟實業爲經營先務有効可圖卽應着手期收繁殖之効土司劃歸總辦管轄原期辦事敏活至一切地方行政所關自應仍責成地方官辦理此節經電軍府尙未奉覆如何核定再爲電知何澤遠既難信用卽由該守調麗察看酌核辦理無庸瞻徇牛紳承漢人極可靠爲所素知惟阿墩彈壓前已改委巡按委員將

秀和接充並飭迅速到差該處土勇由該守嚴切責成妥爲挑練毋蹈前弊已委哨官長既經委定卽准暫留三月俟後裁換希查照辦理總司令刪印

總司令憲鈞鑒宇密窃署府屢承恩委未報涓埃時艱莫補方深引疚謹讀微電准交卸府篆後改委懲獄邊防差事猥以駑駘謬蒙驅策聞命之下感激奮發有不能已並奉籌示方略核定殖邊各節倍極周詳重畀權事機關靈活補崇聲援無微不至欽佩奚似請爲憲台略陳之查任景何三員已成一哨三十名刻又由劍川召集一哨除速派赴富川助任宗熙外尙須補緝五十名是否俟交卸後再行成隊免先糜餉其撥蔣仁孝報効基本金壹萬元拓闢之始濫可動用擬請暫存下關銀行生息留以有待蓋因內地多易土貨資本無多可由商號挪移署府足以自任當此庫欸支絀未可事事仰給公家俟確有效果應辦特別實業可以小往大來屆時再請經費非達此次經營之懲地名曰吉尾上至維西臘早下至雲龍土司地界千餘里查與保山等梗南去千里與阿墩中甸了去千里情勉隔絕所有土司地方行政事件仍請照舊責成印官妥



辦以劃權限如有川藏邊釁孫統領機敏熱忱署府自能就近商承決不稍存推諉請  
紆厯念惟日昨接何澤遠函京由臘早上赴菖蒲桶且稱開廠存糧查教等語查該員  
逗遛維城距富川僅一跬置任委員怒匪不顧欲趨避無險之地其心難測行近欺飾  
擬請飭蔣倅追其原領本金壹千兩免後浮濫抑或密調出麗聽候察看伏乞鈞裁至  
阿墩土勇疲弱缺額情弊已久現憊防藏衝要遽予裁減轉滋疑慮查原委張志仁尙  
未到差可否留榆另用擬請以在籍四川直州判牛承漢接任該員忠實可靠人地熟  
習如蒙允委該土勇百名卽責成挑換以期慎固署府進怒撫剿一切事宜隨時組織  
務求能達目的而後止再者新募劍兵壹哨已由巡按派哨官一名署府派哨長一名  
分帶係爲孚洽兵丁起見每月照防營出支銀三十二兩請暫給三月俟後於委員已  
裁換以符殖邊營制謹此先覆是否有當統乞核示飭遵署府春魁稟文印  
麗江姚守鑒芻電悉由第九營遣散目兵挑編殖邊第三隊各節均准暫行照辦俟該  
守交卸後按照前電所開辦法逐一編制以符定章任委員據探並未遇險或可無虞

惟未得確信應仍迅飭確探具報並酌看情形分派援應各隊行動期間准照現行營章發給旅費前電已經飭知應即查照辦理可也總司令部養印

總司令憲鈞鑒奉示召集劍籍第九營遣散目兵昨稟承巡按委李紹勛充哨官於諫日募齊什兵五十名皓日抵驛委安萬民充哨長刻在麗添足什兵三十名連伙夫共八十八名設司書生一名暫編爲殖邊營第三隊自諫日至漾日每日每名給小口糧銀肆分擬息練三日准於噉日成隊起餉開拔派安萬民率四棚往富川會合任委員派李紹勛率四棚往老母登會合景委員所有殖邊營餉項器械編制事宜俟署府交卸後另行劃歸統一前次往探任委員凶耗迭接富川哨弁及辦糧木廷舉信稟均以該員已招投十二寨僅有三四寨抗拒未投傳報不實等語前來惟任委深入險地後無接應難免意外堪虞尙未接該委確信再新隊開拔在途每棚准給駝馬壹匹應否酌給津貼並乞核示飭遵知府姚春魁稟胥印

省城軍都督府鈞鑒頃據姚守養電稱本日接任宗熙庚日信並上月感日信內附四

月有日至上月感日筆記據稱現住上帕築營堅守景委隔絕於下音耗未通何委淹留於上救援無日各軍尙未會合有攻無守有守無攻該愍夷除投降之外餘匪逃逸甚多每夜間與我爲難祈遷民實邊全江卽平外有嚮導李雲芬逃回窩愍造謠德慶保長抗不聽調請根究等語查任委以三十人孤入險地接應宜速頃成新哨劍籍前遣之兵多未應召半屬生手一面飛催景委及新哨迅期會合始無他虞等語查任委既有確信並有應援或可無虞除飭妥籌進行外謹陳師長根源叩漾印

省城軍都督府鈞鑒頃據姚守弼電稱前聞任委員遇險迭飭探報據富川哨弁及辦糧木廷舉信稟均稱該員先後招撫二十五寨僅有三四寨抗拒未投傳報不實等語惟任委深入險地後無接應尙未接該委確信已分撥接應等語除飭續探籌應外謹陳師長根源叩養印

麗江姚太守覽養電悉任委既有確信並經分派員兵會合當可無虞何委據稱逗留欺飾殊不可恃惟既暫派速進應由該守隨時考查以免誤事此復總司令部漾印

省城軍都督府鈞鑒頃接景委員紹武專函稱前聞任委員長警告遵照即率帶喇井防兵二棚前往援應過江行至恩照村派人前往偵探回稱任與夷匪相戰三次擊斃夷匪數十人我兵無恙云云現劉小隊長興漢已於六月巧日率所部由富川過山開往拉烏接濟任委兵力已厚諒無他虞委員於是日旋落木登等語謹陳師長根源叩沁印

麗江姚太守覽昨接景紹武函稱任委戰捷無恙當經轉呈軍府奉復電開任委員長連戰皆捷甚慰惟辦理夷務須恩威並濟既示兵威宜令向化應如何加意撫循酌施民政之處希即妥籌核飭遵辦等因希即分別轉飭各委員一體知照其已收服各寨究應如何撫循敷設之處並希妥籌辦法呈請核奪總司令冬印

麗江姚總辦孫會辦覽頃據任宗熙稟稱沿江一帶熱毒較甚且蚊虻最多請發行軍携用藥品上帕喇烏兩寨有水田千餘畝無人耕作請遷內地居民前往耕種並請發克虜伯過山炮一尊等語希即酌核辦理轉飭遵照又據請發槍彈軍裝及火藥銅帽



等項已飭榆局剋日解麗計發火藥壹萬斤銅帽壹萬顆單响毛瑟子彈壹萬伍千顆補發號護目軍服拾式套到時希專兵解往轉發爲要總司令麻印

麗江姚總辦孫會辦覽任宗熙之嚮導員李雲芳窩留愨匪時布謠言希即密飭嚴拿獲卽正法至任委所部因戰死傷兵丁六名已電請軍府分別議卹並希飭知嗣後遇有該員等請示事件一面酌核飭遵一面具報查考邊務以敏活爲主此間不爲遙制也總司令虞印

省城軍都督府鈞鑒頃據任委員宗熙呈稱委員率隊進入愨地招撫祿馬登江東西一帶均願歸順惟下節喃竹地上帕喇烏各寨負固抗拒聚衆四五百人夜攻我軍與之相持者六七夜幸連戰數次皆捷現已佔領其地脩建營房惟餘匪逃逸山林時布謠言仍非痛剿一二處俾知我兵威之不可犯不足以議安撫此次我軍陣亡正兵楊煥川一名係被樂箭穿喉中胸傷二十餘處登時殞命此外受傷重之正兵彭正愷周宗康劉占標彭占標熊青雲等共計五名擬請分別卹賞等語謹電轉陳乞衡核示遵

根源叩陽印

大理李師長鑒陽電悉任委宗熙所陳各節尙屬布置周妥此次陣亡正兵楊煥川一名准照上等兵陣亡例卹銀一百元傷重正兵彭正愷周宗康劉占標彭占標熊青雲五名准照一等兵一等傷例各給卹銀六十元希卽轉飭任委分別查明墊給具報請領都督府文印

狀案查籌辦緜緜邊務第三殖邊隊長何澤遠遇事觀望有誤機宜應行撤換遺差查有國民軍第四營左哨官趙瀚熟悉邊情辦事老練堪以委往接充階級照中隊長穿服月薪照舊領支除呈報及分別咨令外合行給狀仰該員即便遵照尅日到差凡何委前領之資本金壹千兩九响毛瑟槍二十桿子彈貳千顆並帳棚鑼鍋等物及一切經手事件務宜點收清楚造冊報查遇事就近稟承姚總辦孫會辦會商第一第二殖邊隊長妥籌辦理切切此狀委籌辦緜緜邊務第三殖邊隊長趙瀚

麗江姚總辦孫會辦鑒頃陳軍府電文曰姚守交替麗篆到差在即惟總辦名稱係屬

公人尙非機關自應定一機關名目曰籌辦怒隸邊務局局無定點以該總辦行駐之地卽爲局所除原定公費外亦無特別開支除分令遵照外謹陳備案師長根源叩齊印等語希卽遵照並轉飭所屬各員知照總司令齊印

麗江姚總辦孫會辦覽現在懋地已經任隊長撫服多寨應陸續移民居住開墾耕種以竟其功前存麗之銅帽鎗著提貳百桿另設一籌辦怒隸邊務軍械局存儲以備將來移民之用除分別令知外特先電聞希卽照辦總司令庚印

麗江姚總辦覽阿墩石登彈壓兩委員前經電准撥歸該總辦管理該委員等所部土勇餉項自應由該總辦請領轉發以期劃一而便稽核除分別令知外特先電聞希卽照辦總司令庚印

麗江姚總辦鑒青電悉殖邊隊薪餉及阿墩石登彈壓之士勇餉銀均飭榆局照章核算解麗銅帽槍麗既無存併飭榆局如數檢解源雖解職仍當從中主持決不使有牽掣困難之虞公其毅然前進妥籌辦理勿墮初心是所切盼至石登阿墩兩委員薪水

向係由該員直接赴省請領茲仍照舊並聞根源佳印

狀查殖邊各隊先後入怒分道進行所宜協力防維遇警策應以免不虞總辦統籌一切職務殷繁加以道路險阻交通困難照顧或有難周亟應添設提調一員以資贊助而便指揮查籌辦怒猿邊務第一殖邊隊長任宗熙勇略兼濟辦事熱誠此次率隊深入怒地不避艱險撫有三十餘寨收效尤爲迅速深堪嘉尙應即委充籌辦怒猿邊務提調仍兼充第一殖邊隊長月薪照舊定支給凡對於各殖邊隊及各委員有稟承總會辦發行命令指揮之權但經理頒發軍裝軍械以及一切雜務係屬總辦權限除呈報及分別咨令外合行給狀爲此狀仰該員即便遵照稟承總會辦妥慎辦理用副委任切切此狀

令照得怒猿邊務籌辦事項曾經呈請委該守承充總辦并添足國民軍一營分爲一二三四殖邊隊歸各員分途帶往所有應辦事宜均稟由該總辦決定准其便宜從事各在案惟查該隊有應行裁改并添設各員所需薪餉服裝駝馬津貼等項亟應規定



俾資遵守查現在陸防各軍公費均實支實報該總辦提調公費自八月初一日應遵照實行樽節開支按月列摺呈報惟不得逾所定八十兩十兩之額至國民軍官長薪水較薄該員等事屬創辦且所在多屬瘴區薪資均特別優給現奉軍都督府通飭改兩爲元應即遵辦惟截作公債一層現暫不截扣其自書記司書以次護號什兵夫等餉均應照防餉舊章支給餉額另單呈覽惟其中護號兵似覺稍多擬裁護兵十一名號兵二名即以裁節之餉添設軍需一員月給薪十五元軍醫生三名每名月給薪十二元管理軍械局委員一員月給薪十二元局用燈油茶水定公費式元捌角所存護兵五名總辦用二名一二三隊長各用一名以上添設各員及差遣司書等員均由該總辦委任隨時呈報該主管機關查考以重責任至提調及二三兩隊長并委員仍照前各給騎馬一匹共七匹每月照領馬乾駝馬原定十二匹現添足一營恐不敷用應准添六匹仍按日領脚由各隊分用行駐均給即可截長補短以足開支不得另行報領又各員兵津貼省中官兵均一律給洋七仙旅行准領打駐不給現仍照舊按日無

論行駐均給洋七仙略示體恤至每年服裝每兵准領單夾棉衣褲裏腿各一套軍帽一頂包巾壹條布鞋叁雙所有上項應領餉裝每年仍按季請領於每季之先一月卽將各隊薪公餉乾津貼駝脚等銀數目分別具摺派員赴榆餉局預爲領存衣裝亦按季配發春季領夾衣褲壹套軍帽壹頂包巾一床軍鞋一雙擲腿一雙夏季領單衣褲壹套鞋子一雙冬季領棉衣褲一套鞋子一雙統由該總辦核實派領解存該行局屆期轉發各隊以資散放又阿墩石登兩彈壓委員所帶土勇餉銀均應照各處舊章數目向榆局請領并由該總辦核領轉發不得再由各員逕赴局領以歸統一而便計畫且免各隊分派員兵致曠職守其有未盡事宜并由該總辦隨時查酌情形條陳該主管機關核示辦理可也除呈報咨令外合行令仰該總辦即便遵照辦理計發餉章一件此令籌辦怒徠邊務總辦姚春魁

籌辦怒徠邊務總局及所屬殖邊隊餉章總辦一員月薪六十兩合洋八十元公費八十兩合洋一百一十元共洋一百九十元會辦一員兼差不支薪提調兼第一殖邊隊

隊長一員月薪七十元公費十三元八角共洋八十三元八角第二三殖邊隊長二員  
每員月薪四十八元共洋九十六元委員四員每員月薪二十七元共洋一百零八元  
差遣員三員每員月薪十六元六角共洋四十九元八角軍需一員月薪十五元共洋  
十五元書記一員月薪十六元六角共洋十六元六角司書生五名每名月薪七元二  
角共洋三十六元軍裝委員一員月薪十二元公費二元八角共洋十四元八角軍醫  
生三名每名月薪十二元共洋三十六元號護目各一名每名月餉八元三角共洋十  
六元六角號兵四名每名月餉五元四角共洋二十一元六角護兵五名每名月餉五  
元共洋二十五元什長二十四名每名月餉五元四角共洋一百二十九元六角正兵  
二百一十六名每名月餉五元共洋一千零八十九元伙夫二十四名每名三元六角共  
洋八十六元四角騎馬七匹每匹月 四元 角共洋 百 十元 角駝馬十八匹  
每匹每日二錢五分二十九日月分共銀一百三十兩零五錢合洋一百八十一元二  
角三十日月分共銀一百三十五兩合洋一百八十七元五角三十一日月分共銀一

百三十九兩五錢合洋一百九十三元七角全隊官佐什兵夫二百九十五員名旅費津貼每日每人七仙二十九日月分共洋五百九十八元八角五仙三十日月分共洋六百一十九元五角三十一日月分共洋六百四十元零一角五仙以上全隊官佐目兵夫二十九日月分共洋二千八百一十四元六角五仙三十日月分共洋二千八百四十一元六角三十一日月分共洋二千八百六十八元四角五仙  
附籌辦慾球邊務委員長任宗熙函一

師長大人閣下敬稟者竊員等自稟辭後於鶴慶一帶頂補寔業兵丁業已招足只餘空額四名留補通事嚮導之用至麗謁姚府並遇蘭州土司及劍川紳士李雲芬會議一切即由麗與景勛仲帶兵分行擬定勛仲由喇雞鳴前進蘭州土司任其後熙由維西選道過山李雲芬爲嚮導勛仲進至兔莪被雪阻於蘭州土司署熙抵維李雲芬仍未到即駐維數日探詢進路數道均爲雪阻繼又連雨十餘日雪更加厚惟有仰天長嘆莫可如何自念處此時艱虛糜餉帑坐老精神上無以對憲台委任之苦衷下無以



抒夙昔之懷抱無已只得於兵士勤施教育而已矣三月初間天始晴已通知勗仲決定是月下旬過山現在招集頭目計畫運糧修路各事但前在榆所辦之貨與怒地不大相宜已命庶務員甘如飴在維售訖仍往大理另購且請領第二次之餉銀餉冊摺已交大理司令部並懇憲台電飭發給紫花軍衣各一套撥發工作器具疊鋸四把斧子八把方匙十把十字鋸十把爆葯十斤以爲修路之用可否照發之處出自逾格鴻裁再維西郵政班期太緩且間有遞不到之事祈飭改良麗維一帶尙屬甯靜漢夷相安守土官吏民無怨言三月十一日稟

附籌辦怒徠邊務委員長任宗熙函二

師長大人麾下敬稟者竊員於四月初六日奉到憲台札開添委何副委員長澤遠幫同辦理是月初十日該副委員長來富川與員晤面籌商一切該副委員擬由上路經茨中過山至白汗羅順潞江而下並調查上江一帶情形將來在未開化之地方與員等會合員由中路自富川進兵現已實行修路再約十餘日即行前進景副委員長已

由兔莪繞下江而上大約再兩月各路均可會集一地俟會到時再如何措置一切情形詳細報告但何副委員長分任一路不能不有公件往來擬請照景副委員長例頒給籌辦獐狽邊務副委員長木質鈐記一顆以昭信守是否有當出自逾格鴻裁如蒙俯准請發交維西廳轉給是荷再者員於三月中寄呈一函諒邀鑒察

附籌辦獐狽邊務委員長任宗熙函二

師長憲閣下敬稟者近來雨水甚多所有動作輒多碍難自員移駐富川後召集各村頭人演說一切並調查滄江中段情形僉言獐夷時出搶擄邊民幾不聊生此次開闢深符民望民等願盡義務爲我修路四月初即酌派民夫修由其普管進入之路隊中兵士自行督工悉將烏道化爲夷途可通馬馱現已將抵雪山脚山脚舊有龍潭潭側卽該夷出入搶擄之要口員於潭附近蓋造卡房一所業已成功定於是月二十五日拔隊踏雪過山（其被雪堆積之處俟消化時再爲開修）仍按次修路而進其在山內未修完之路及守卡之兵已移知麗江府飭國民軍第四營右哨（係駐富川者哨

官任先贊）請派兵一棚常駐龍潭卡房糾察匪類並暫派一棚監修未完之路其駐龍潭之兵尙乞憲台札飭麗江府照辦恐其畏難推諉四月初十日何副委員澤遠到來籌商完畢該員仍回維西前進員已將各情函報憲台諒邀電盼十九日景副委員來函言現已遶道過山將抵落母墩又蒙憲恩復委六庫司及卯照司幫辦但該委員言擬請款修路員思現庫欸支絀不能不變通辦理如在舊有管轄之地卽飭該管長官派民夫自行修補在未開化之地卽着該夷修路以爲投誠之贄此於公益實多於該地方亦不無利益似非苛求除員與景副委員會合時指示一切外仍乞憲台札飭怒江各土司認真各修各管之地實爲公便再員於富川調夫及辦糧各項該地總團正木廷舉團正尹煥章二名甚爲出力合併聲明餘容後報端此虔請鈞安伏乞慈鑒  
四月二十三日謹稟

附麗江府姚春魁抄呈何委任委信函委充籌辦怒獄邊務副委員長何澤遠來稟

監督大人台前鈞安謹稟者竊員由葉枝具呈一稟諒邀洞鑒於初五日員進赴菖蒲

桶因途中道路顛險前經彈壓委員夏君修葺年久圯廢今復派夫整頓是以遲遲至今查怒江糧食絕少採辦維艱且擴充球地轉運深屬不便員擬在維屬沿江一帶組織一糧股商乘公司分籌以富川維西北極汎岩吡康葉紅坡阿墩子等處爲儲聚之所平時主義作爲商務經營轉輸接濟探有鑛廠之處亦可作採辦工糧或遇歲歉可以賑備饑荒如有邊務可以補充軍需而免民累擬先設抵怒江從緩擴充球境總期手腕敏活辦事方收效果邊氓亦不至坐困淪亡一切善後情形曾經倡列廣告贊成者夥然未經師長監督命令未敢擅自擅專且沿江一帶渡口太多與球夷犬牙相錯盜匪出沒無常欲謀商界之發達必先殲除寇盜員擬阿墩子以下謹設羊哨岩吡富川三渡足矣其餘概行封禁旣可以彌盜賊又可以便商行所有商貨出入均須照常征收此名作爲保商抽稅沿途緊要地點必先佈置警戒兵丁此項抽收卽爲警務籌餉稍有不虞并可以貫串曲防將來兩江進化商道暢行全權效果可以拭目而待是否如何尙請裁奪查沿江民智甕塞風氣未開員每到一處均宣講中國獨立大概情



形表揚

師長監督

維持邊防之盛意近來法人於十數年前即在小維西及茨中白漢

洛捺那桶等處開設教堂經營邊界其用意在買服人心遂有等無知愚氓錯抱方針以投教爲榮陞階級以至附近居民男女投教者恒數百計甚有防軍投教之恥良爲惋歎既經投教之後一應生命財產悉憑教主裁決而該愚氓亦甘聽其指揮甚有將產業賣歸教堂者其用意之所在員亦難備攷其詳略謂滿清時代外人假君主之威權用以欺哄愚頑遇有緊要危機僅可以恃教堂爲護身符法普通人民抱何含冤亦不能向教民過問此種有害公理之事條約亦未必能載且影響到處利害攸關員有籌辦邊務之責斷不容此澆風叢生邊幅將來相習成癖不特於人民深有妨碍且於邊遠交涉殊多不便理應稟請嚴禁私賣與外人地土以及有碍民情等事以期慎重邊隄而固邦交員具呈各節均屬智識淺鮮不合之處尙請指示俾得遵循善誘是員之所至望者也員此去擬從擦瓦羅界順江而下務必逐寨撫綏佈置停妥然後由普拉龍以及未曾開化地方與任景聯合進赴球境俟後一切辦法自當隨時稟請書爲

籌量爲此謹請原鑒仍祈轉稟師長爲望即候台安民國元年五月十五日由菖蒲桶  
謹稟

委充籌辦獠徠邊務副委員長何澤遠來稟

監督大人清安員前具稟各情諒邀原鑒於二十日員在菖蒲桶疊接任委員端函云  
稱至路木登有上帕喇烏兩寨抗不歸附將有戰爭之勢於五月十二日晚該夷聚集  
四五百人於天未明欲行劫營幸爲我軍所覺擊退該賊誠恐兵力不及示命員率軍  
赴援奉示之下理合具稟監督查上帕喇烏兩寨向隸麗屬即前妄殺德人之頑匪又  
值夏委員到彼深相構怨該夷勢甚不平若不趁此殄除兇寇相機進剿將來養成銳  
氣勢已難圖且兩江亦萬難收拾并據任委員云景紹武在下節被夷截住俟此首尾  
不能救應深於前途不便特此端稟謹請監督立命維西協營速撥附防助援并仰維  
西廳札飭沿江內外土弁火速運糧接濟員已一面調葉枝所屬獠兵百餘名及民團  
百餘名由搓駱阱翻山赴援去矣各情懇祈轉稟師長是否如何立候回音即詢台安

民國元年五月二十五日由康普土署謹稟

筱村太尊大人閣下昨奉師長命令閣下爲敝軍監督幸甚盼甚所有敝軍入怒地后辦理一切情形詳於日記希爲轉呈師長現雖佔據匪夷巢穴該夷逃遁甚多常逞困獸之志每與我軍爲難敝委員一再忬忱誠不欲根株刈盡詎該夷頑梗不化存一勢不兩立之心而我軍人數太孤守則無以爲攻攻則無以爲守敝軍現在上帕築營若我軍不退該夷亦決不能回所有上帕喇烏喃竹地三壩中水田旱地甚多無人耕作祈閣下轉飭內地農工兩項人等卽速遷徙實邊並希派兵一哨保護遷民再派兵駐滄江德慶關地二口防該匪逃竄現與我景委員之兵上下隔絕一俟會合則全江即平矣端此敬請升安惟希惠照不宣五月二十七日午前九小時愚小弟任宗熙頓首

筱村太尊大人閣下五月二十七日由富川國民軍敬呈一函及日記諒登青盼近來雖攻破悍夷巢穴然餘匪逃逸甚多遍滿山林時布流言糾集無知愚夷每於夜間與我爲難又恃地形險夷欺我槍力不能及之處江之對岸或山頂白晝亦聚集多人游

觀戲我我各軍尙未會合人數太孤守則無以爲攻進攻又不能守而不攻則各寨觀望不投承平何日不守則旋得旋失亦屬徒勞且夷性反側無常已投者亦常反覆非用强大威力將弩弓藥箭消除不能完全治理若以等閒視之亦難矣風聞該夷等有言再數戰不勝即暫投俟將來雪山一封再夥同反殺敝軍現在上帕築營爲永久之工作堅我軍效死勿去之心但敝軍近日應行改良物品及應增加各項尙希太尊轉報師長惟過山炮子彈二項祈電達師長將貴署舊存者撥用以應急需實爲公便至於近日辦理情形詳在日記善後各項俟肅清后再爲報知外有前委充嚮導員之李雲芬自同敝委員過山後先往招安詎伊陰陽其中竟於該匪來攻之日逃回近聞窩留怒匪時布流言又江西德慶保長抗不聽調該村舊與怒夷有往來者亦造謠惑衆凡茲種種均於招撫前途大生阻力尤希太尊嚴爲根究手肅敬請升安諸維亮照外附申文及日記並彈壳壹千壹百伍拾個六月初八日愚小弟任宗熙上言

任委員宗熙日記



四月二十五日陰晚雨全隊軍士自富川開拔運糧及各項公物措夫二百餘名行約四十里宿於老烏寨其路經我開消馬馱均可通行晚召巡防軍頭目來示以後日修路監督之法

二十六日午後及晚大雨沿其普河上約四里過橋繞山腹上行經未修之道甚屬難行三十餘里至我修蓋卡房之處與我監修之軍士會合房在河右岸殆平地以木板造成二萬五間可容六七十人其地冬末春初有雪積焉晚貼示於卡房告往來人勿得毀壞此房

二十七日晴出卡房即踏雪平行約四里至龍塘卽河之源周圍七八百深不可測由潭右上行傾斜漸急雪厚丈許行動尙不困難十餘里至山頂雪風凜冽無不毛髮森然奈各軍士前導領率始克通過嶺頂十餘步即下坡坡度甚急罔不踣跌白甸措夫趙長福一名凍死於雪中外有二名幸而救活雪地及濫泥中行二十餘里宿於坡間二十八日陰起行卽下坡坡度甚急鳥道羊腸滑而難行三十餘里有阿底媽底一寨

散處於半山間又約十里至饒利我軍駐此自此寨沿江東以上九寨係黃忠瑞之先伯父所管轄者但未完善治理至今則有名無實該夷尙淳猶聽招撫惟江西夷民將箇索及筏全行毀壞

二十九日陰駐饒利目兵擦槍命黃忠瑞招集該管各寨頭人清查戶口晚給白甸頭人條鋤一把命回時埋凍死之措夫恤賞該夫家屬銀式兩並發命令一張囑該夫家屬毋得與該頭人爲難寄蘇庶務長一函囑催糧

三十日晴駐饒利目兵洗衣黃忠瑞所管之民來修路命黃監工寄景副委員長一函示以布置一切函命彌朶專人送達

五月初一日半晴陰駐饒利命彌朶下行通告各夷民毋得驚惶並寄信與景委員發拉打彌列寨門牌十一張阿底媽底門牌二十三張賞各頭人鹽每二斤午後催人紮筏赴江西招安各寨晚李雲芬來言據前日派出調查人回云各夷民有惶恐者

初二日陰駐饒利早命李雲芬前往上帕喇烏一帶安慰各夷民飯後余率目兵數名

下行十餘名看前日所修之路甚是狹小現因耕作之時未便派夫再修午後回催黃忠瑞開報該寨戶口人丁

初三日晴駐饒利命人下行傳祿馬登人修路怒地菜蔬無從購獲派目兵數名上山採野菜而食午後黃忠瑞開來怒坎村把打朶拉宜馬朶三寨戶口傳諭怒民有往滄江買物者須來行營報名給照前往晚赤色地民黑乍往滄江諾古討帳給護照一張初四日晴駐饒利該地全在傾斜面上操場無處覓得命目兵復習柔軟體操及瞄準午後由裕谷登寄來一函言上帕喇鳴喃竹地三寨聚人數百於祿馬登攔路言漢人無有信實如前年夏師爺來起先呵哄後來燒殺夷民要求不要進兵情願歸順等語當即復函暫不進兵須急將人丁戶口開報云云

初五日半陰晴駐饒利命忠瑞前去催未開報來之人丁戶口該村夷民黑饒乍往滄江買鹽給照一張並寄木團正一函囑調德慶之阿五陀阿志阿書那路那苦前來聽候差遣該五人係管有怒民者並寄蘇庶務長一函囑運糧事

初六日半晴陰駐饒利李雲芬之消息無有投誠之耗全無知該夷前是言爲緩兵之計擬定於初九日下行囑黃團正調夫該團正開來赤色地把格拉饒利足饒家饒五寨人丁戶口我軍初到該地該寨男婦甚懷畏懼無敢相見者近日漸相熟習於唱軍歌時有來觀者

初七日半晴陰駐饒利黃團正開來崖主谷喃拉洛二寨人丁戶口而喃拉洛尙有二三十家歸怒副爺管尙未開到余填所有開到各寨門牌

初八日半晴陰駐饒利喃拉洛戶口開到只有十七家各俱填訖發交黃團正午後整理行裝

初九日晴早召集措夫百餘名頭人賞以鹽民夫賞以線點名發牌訖於七點鐘起行下坡四五里繞山腹下行約三十里直臨江邊山脚一小壩水田尙多祿馬登下寨散處於坡上及壩中彌朶派人來接於寨外該寨人尙淳良無驚惶之狀我軍駐於壩中之江邊上午傍晚李雲芬命人寄信來旨上帕喇烏人狡詐之狀和發春以前派去之



人亦回言該數寨人心懷叵測前頭要口業已將路毀壞並要防該夷晚間燒營須用強硬手段將該數寨人壓倒則全江歸順矣我軍無時不有衛兵警戒到此地尤爲戒嚴口令警戒

初十日晴駐祿馬登氣候甚熱目兵洗衣命和發春赴祿馬登上村招安午後該寨上下兩村來投誠四十九家接到蘇庶務長由富川來函言何庶務員運來米鹽於初十前後起身晚間派人四出警戒口令攻擊

十一日晴駐祿馬登寄黃團正一函令派人赴山脚接糧寄庶務長一函言俟趙廿二庶務員到時卽速來懇耑伙夫何永盛到何副委員一函促其帶兵速來攻上帕喇烏如該兩寨降則全江之撫綏不難矣富川文盛之母於江西詩朶取係去年九月於其普砍柴被獯子劫去者借我軍威於是日取回午後錄馬登人又來歸順六家大浦洛來投誠一族計五家晚間戒備尤嚴口令佔領

十二日晴駐祿馬登命人過留至江西各寨招安有言緩日來歸者有恃長江之險抗

言不順者午後滄江闢地伙頭告歸帶行慾子三人給以護照一張寄庶務長一函晚德慶人江西赤黑地人來言上帕喇烏喃竹地三寨爲首招集各寨三百餘人今晚前來燒已有到祿馬登附近者我軍除出差而外官兵只有三十二人平分兩班一班左側高地距營約四百密達之田地一帶散開一班於營之前方約三百密達之旱地內散開並派偵探於前方時時偵察營之後右有箇索一條亦派伙夫持刀守禦十二點鐘發見前面江邊一帶距我七八處時有火把出沒口令得勝

十三日陰午前四點半天尙昏黑慾匪先出四五人於旱地散兵線之前方五六十密達內我軍開槍擊之聞有嚶啞之聲連擊數槍後槍烟迷眼覽不見人四點三十五分高地上亦發見慾匪數名我軍亦開槍射之該夷亦以槍對射將我營門上之旗幟洞穿二孔四點四十分該夷退後五十分我軍兩班同時追逐行二里許天大明沼途檢拾夷匪弩弓數十張藥箭數千枚米囊皮帽刀矛搯帶無數江邊石上步步有血每狹處多有滾跌之形狀下路追出七八里而還上路余率五人隨足跡而追至祿馬登上

村下方聞有狗吠之聲再上半里許聞寨中人聲沸騰甚屬可疑我軍人數太少未便進搜而還早飯後派軍士二十名上至該寨問其所以拿獲一人問詢即供出數人隨將數人拿回余再細訊供多模糊午後野雪地來投誠十家是役也夷匪死一名傷三人雖未大創然已懾多夷人之膽矣晚間輪班警戒口令投誠

十四日陰早文盛同伊母回富川帶行獮子一名給予護照一張致庶務長一函九點鐘江西面葛獮民回帶來一函言何庶務員尙未起身因措夫調集不來故且言獮子有二三百人在滄江一帶有言貿易者有收鐵金者獮子自清時咸豐間即在滄江一帶向民間收討犁鋤等物謂之收鐵金不與卽搶擄聞言之下不勝痛憤現在我軍數十人深入虎穴事未肅清何能分佈各隘口盤查出入十點鐘面葛人回囑伊傳與各寨明日再不投誠卽帶兵進攻午後野雪地又來投誠十餘家特別箚來投誠六家聞人言前日之戰獮匪撲江死者數人旁觀見我軍之威力願投者多晚警如常口令銳

氣

十五日半晴陰午前江西來投誠幹布詩朶赤黑地面葛密滴沾不拉底六寨該數寨人俱淳良善於貿易在江邊一壩中惟幹布在祿馬登正對之山坡上前數日抗言不投言潞卽是我之皇帝前日一戰亦畏威來投午后江東來投誠黑拉洛一寨二十家該寨前日亦有人夥同獠匪來劫我軍者今來歸順暫道其罪以觀後效同時赤黑地人報稱今明兩晚獠匪又要在江東江西兩面來劫營賞報信人訖余同小隊長副官等外出偵察地形擬於晚間分配一班於前面要口埋伏獠匪來時任其深入俟抵我營守營一班痛擊之退至要口我兩軍夾擊之江西來匪置之不顧只派兩人守箇索而已傍晚雨竟於終夜匪竟不來是日細訊拘來祿馬登上村之人確係未來不過次早黑拉洛人回在伊村中暫駐耳晚准下村頭人保釋口令殺敵

十六日陰駐祿登致黃團正一函囑如我庶務員運鹽及米來饒利時令其暫存該處俟肅清後來取午后江東息利地來投誠五十五寨連宵防範軍士疲勞幸該匪書不敢來尤得晝余則白日招待各投誠人填給門牌疲敝尤甚然尙可以支持軍士之勇



氣尚銳晚間上夜只派步哨逡巡下夜則全班防守緣該匪每於天將曙時行事也口  
令大捷

十七日大晴午前殺牛餉士並分給寨中人決定明日下行攻勦黃副官因勞病重命  
人送回饒利調養風聞李雲芬於前夜夷匪來劫營時在喃竹地私逃擬將不急需之  
物件寄於祿馬登以減少拖累江東阿烏堵來投誠一族計十家據言今夜夷匪前來  
決死戰勝固不投不勝亦往徠江去矣午后料理行裝寄四十措於伙頭家饒利居民  
明阿四人前往富川買鹽請去護照一張寄庶務長一函晚命伙夫於一點鐘造飯口  
令追擊

十八日晴午前一點開飯二點將行李運出屋外三點分班外出埋伏候至天明該匪  
不來五點命頭人派夫六點早飯食粥七點措齊集起行順江下沿江一帶多有水田  
行二十餘里至險要處懸崖壁立直臨江下我軍將至隘口時見喃竹地寨中出四五  
人上崖余命人翻語俾不要上山好好投誠不根究前罪若硬要截路我要開槍匪夷

不聽連續上开放下播石我軍開槍擊之寨中又出數十人亦開槍對射子彈飛來確係快槍是前日得之者我軍對射片時然因距離千餘密達遠無有効力我軍前

進該夷等早將崖邊棧道拆卸幸昨日派來彌朶之子稍爲修葺然亦危險太甚上面播石頻來值此進退維谷之際我副官軍士小隊長等奮不顧身彖行以進幸播石在人前後落下均未受傷及我官兵脫出危險界時急速開鎗射斃三名夷匪始退前班數人尾追其後直抵該寨夷匪四散火其數家後班掩護攜夫通過匪夷退至把結沽我軍追及槍斃二名擒獲父子二人其子確與匪夷同夥者隨卽斬首是役也殺敵六名奪獲糧食數担佔領一小平原我軍死傷俱無敵雖不勁而地勢已厄人太甚矣幸我軍之銳氣足以克之傍晚傳餐人人餓甚宿於喃竹地晚間警備如常口令領土十九日晴午后微雨午前六點早飯六點半未帶行李出發沿江下行約十里至一塊壁該寨前雖同夥匪夷犯順今日逃避未敢抵抗我軍出村之前端見對河上帕寨中數十人携弩帶刀上嶺備戰我軍出村半里分兩班副官二員率軍七三名由半坡在

河之右岸向該寨行助攻其餘衆軍下行經水田中至河邊河寬約十密達流量激湍深約一密達五不可徒涉砍竹編橋而過半小時過畢經亂石荆棘壩中向該寨行主攻我主攻軍散開將及坡脚時助攻軍見該夷弩箭連發並見執刀跳舞旋即開槍主攻軍行抵下寨亦開槍擊傷夷匪一名該夷等退至谷中及嶺上屋中糧食器具早搬運一空門壁亦拆去我軍卽燬其巢穴午后二點我軍尾追擊斃數名於樹林崖石中搜獲穀子數担我軍佔領該寨后命人至喃竹地取給養及其到時天昏黑矣七點鐘始行晚餐宿於上帕上村夜間雨警備如常口令銳進

二十日上午雨下午陰駐上帕早余同小隊長副官等下壩偵察駐軍地該壩南方一帶水田成梯形壩中稍北一帶旱地大石錯雜距水甚遠俱不適宜沿江北上命和發春暉江西人早早來降后行至壩北見一林園溝水圍繞適合築營該地雖較喃竹地稍遜然有數利在焉在野夷怒江地之中央便於鎮攝一也田地較多居民可以多駐二也民多則教化容易入手三也由是決心於此地築營早飯后命趙副官派人於喃

竹地搬運行李移駐於林園茅屋中派軍士搜索該夷遺棄器具凡於我公共有用者  
余計畫築營事項晚命息利頭人回派夫修葺險要棧道寄庶務長一函晚警戒如常  
口令創業

二十一日終日雨駐上帕早余命大蒲洛頭人上行派夫搬運喃竹地之什物午后江  
西不節凹沽渠兩寨先來二人投誠其餘人衆未敢過江余與該二人演講一番仍命  
過江招撫各寨傍晚指夫十名到什物猶未運完江西赤黑地頭人來請門牌爽溪里  
來投誠積又謝阿圖來言一塊壁人前因被脅犯順現在逃避山林不敢來歸如准投  
誠願往招之余俯准其請夜間雨警備如常口令鎮定

二十二日陰雨江水河水大漲駐上帕午前命副官帶人搭橋二道江西赤左洛寨來  
投誠十家不節凹投誠十四家爽溪里投誠十九家江東沱作滂投誠二十一家低里  
濟投誠六家阿處笛投誠七家五堵底投誠十三家拉木底投誠二家大村投誠三家  
茨菰地投誠十二家均未收投誠禮物令於天晴時派夫來做工夜間雨警備如常口



## 令建設

二十三日陰雨駐上帕一塊壁公舉數人來投誠命將弩弓毒箭繳存招回婦孺糧食牲畜各物江西詩砥來投誠九家怒地最野蠻之地雖經我軍破壞然建設亦非常困難未歸化者尙居多數卽畏威向順之人亦仍有欺我軍少口是心非者而我景軍隔於下音問莫由通何軍淹留於上來援無日欲分兵策應則人少碍難分遣欲全軍以出而我既得上帕爲根據地糧食輜重携行困難且將已得之地歸於烏有值此四面受敵之地幸敵非強勁不然我軍早爲魚肉下咽矣駐宿地蔭蔽太甚夜間警戒困難

## 口令思危

二十四日晴駐上帕派江西不節凹江東一塊壁人來築牆江西人未到一塊壁派來二十名繳來弩弓十七張箭包十餘個連日探聽我景副委員消息殊無音耗前日彌朵帶去之信亦未送到折足回午前九點接庶務長寄來一函言師長委麗江府姚太守爲我軍監督並言接景委員來函云伊同各土司由山路一帶征收門戶而行計算

尙未到羅母得前後甘趙二庶務員亦到富川趙庶務解餉於景委員之後甘庶務不日前來午后發給彌朵門牌一張改喃竹地爲歸仁村一塊壁爲崇義村夜間警備如常口令改良

二十五日晴午前四點二十分夷匪聚集數百人四面圍攻由北來數名藉遮蔽物接近我之伙夫房該匪用約二丈長之竹竿持火出現我步哨開槍擊之匪將火竿射於茅屋回身逃逸我軍聞警齊出火幾燎原一班救火一班開槍掩護旋聞南方旱地內匪夷嗥叫之聲似有百餘我軍用氈簞將火撲滅後天將明派人於江邊篋繩處堵截天明人回見東南北三面距我營四五百密達之處遍地插籤重疊數層長二三尺數寸不等我軍拔取回六十餘束深幸我軍未乘夜追趕不然亦中匪計矣匪夷退至喇烏後方之了口上早飯后猶見數十人在上持弩執刀跳舞八點鐘命小隊長副官等帶軍士二十名沿江邊遠截該匪之後方及我軍升至該匪跼立處已無一人焚其巢穴該寨左下方亦有懸崖一堵與喃竹地之要口相似匪夷逃上山頂及懸崖之下方

各半我軍人數太少不便遠追而還九點鐘將米糧貨物搬運於不容易着火之地拆其茅屋一間是日所派做工之夫無有到來者仍不能築營午后我寄存於祿馬登之什物運來十餘措因措夫不易招集故未全來四點鐘傳信與已投人等有能擒殺上帕喇烏人者俱有賞賜晚將早晨所獲之竹籤遍插於營之附近警備如常口令公共十二點聞犬吠之聲似有偷渡者命小隊長副官軍士等六人偵察擊斃偷渡一人於

江中

二十六日晴駐上帕經始築營砌其後方之石脚午前九點爽溪里又來投誠一族午后風聞夷匪結盟又要與我軍決死或於晝間乘我軍作工時撲殺我軍士晝苦夜防疲敝已甚足見踵衣見肘蚊聚成雷咬成瘡疾形骸之表面似覺難堪然而志氣之激揚猶是完全軍人資格夜間警備如常口令生活

二十七日晴傍晚微雨見虹狂風一刻駐上帕築營牆作工亦加警備江西沽渠不節四二寨始誠心來投午后一點見半坡間夷匪一名出沒命副官等追逐該夷被我軍

擊傷逃脫四點鐘我何庶務員運糧到來帶富川巡防軍士四名我周副官之弟周宗銘亦來是前在最有膽氣者我軍又得數人之用接到李雲芬逃回寄來一函類多毋稽之語晚致姚太守一函請遷內地民實邊並於忙中草繕日記請轉呈師長致景副委員一函致庶務長一函給德慶商民昌都護照一張夜間警備如常口令滅敵謹將六月第七號以後日記續呈

第八號乍晴雨駐上帕築營壙午前七時命火夫一名致信與何副委員令其速來午後國民軍軍士要求回富挽留不住晚呈師長申文一角信一函請領鎗彈過山炮爆藥行軍携用藥品及尋常火藥銅帽等並報傷亡人數子彈銷耗數及五月二十八日至六月第七號之日記並麗江府一函夜間警備如常口令堅忍

第九號半晴陰駐上帕築營壙午前派夫送國民軍軍士回午後半時致信與何委之人回言副委員今日到來晚仍未到夜間口令沉着

第十號晴午前二點半夷匪十餘名將我新築之營壙推倒數板被我步哨擊退十一



時半何副委員率該軍到來並調來西防國民軍第十營右哨之五棚維西滄江一帶  
土兵三十餘名夜間口令合力

十一日晴駐上帕經理營房派崇義村人來栽秧其土地尙肥秧一苗一插甚費工程  
該村所言上帕人有數家欲來投誠准其請否余允其請晚派副委員之軍士及國民  
軍各派步哨稍分我軍疲勞口令同心

十二日晴駐上帕工作以木刻傳江西面葛一帶人來栽秧夜間口令破敵團兵逃去  
二名

十三日晴駐上帕工作午后調集嚮導擬定明日搜山夜間夷匪十餘名來却營被步  
哨擊退口令搜索

十四日晴午前五時派副委員兵十五名國民軍二十五名團兵二十名我軍十名分  
三道搜山余在行營督率工作午后搜山軍士陸續回報稱夷匪散逃岩林藪箐中不  
能捕獲我軍回經江邊對岸又來努箭我軍開鎗對射擊中一人傍晚該村遙叫明日

來降既晚清查人數國民軍哨官及十長三名團兵五名未回派人往尋不獲口令追奔

十五日晴早見虹發二岔駐上帕工作午前九時和哨官及團兵等回晚與何副委員和哨官喃土司會議令何委員帶國民軍團兵分紮喇烏屯田口令畏威

十六日晴間雨駐上帕工作午前六時命楊小隊長帶國民軍十名赴面葛一帶派夫栽秧七點命崇義村伙頭陀娃笛阿匹你阿呂三人前往各處招降上帕喇烏流氓及不節凹金左洛各寨給以傳單一張茨菇坵來夫二十名插秧何委員至喇烏偵察營地團兵逃回數名午後野雪地伙頭送到黃團正一函言上節江西一帶願投並請示修路常卽回函准其請夜間口令分防

十七日半晴陰駐上帕工作江東施朶頭人率十人來栽秧何副委員率團兵及國民軍三棚移駐烏午後崇義村頭人招來投誠阿主洛四家威謫八家圪堵谷八家賞各頭人以衛生帽夜間口令撫綏

十八日午後雨駐上帕工作團兵六名請假回家午后崇義村頭人招來江東金左洛一寨投誠給以門牌七張風聞我景副委員在羅母得築營夷匪多數逃在鷺馬底附近夜間口令雄圖

十九日陰是日爲陰歷端午我軍休憩阿主洛三村派人來栽秧午后余與軍士亦同栽插夜間口令壯志

二十日雨駐上帕工作移文與維西協請移臘早國民軍應援照會臘早何副哨長文灼午後喃團總土兵二十名回傍晚接阿烏堵來人警報祿馬登口傳來信言前日回去團兵六名在祿馬登岩石北被匪砍斃二名捉去二名其餘二名落江與生逃未能確曉其稱述多矛盾擬明日調祿馬登頭人細詢夜間口令警報

二十一日上午陰下午晴駐上帕工作命人傳祿馬登頭人十點鐘崇義頭人領上帕人三家來投金左洛派夫二十八名來插秧風聞在祿馬登截路者係彌篤之子又聞夷匪約人於數日內要來拚命夜間口令健兒

二十二日早雨午晴駐上帕工作阿主谷頭人領來雙米底人五家投誠飭其往招上帕喇烏人來投午後崇義村頭人報告夷匪欲來之信晚間我軍移住土房將茅屋拆去以防火災正值邊務棘手之際我軍士發見一般驕傲之容不禁使我心痛晚間口令慷慨十二點病加劇嘔血數口

二十三日晴駐上帕工作接景委員來函言已起身往麗籌欸請兵接木團總一函云購糧及調夫困難情形夜間口令雍容

二十四日晴晚微雨駐上帕工作前駐喇烏之何委員軍士及國民軍要求回駐上帕不允恐退讓而長夷匪之氣也夜間口令豪爽

二十五日晴晚微雨駐上帕工作該地氣候炎熱軍士多病午前崇義村頭人回言前奉命往招江東下節各寨現已相約由鷺馬底下方大河以上投何委處又聞江西夷匪聚約二百餘人欲來攻何委員或歸仁村又探得前日回去之團兵被彌篤之子拿昌三人於二十三日在對面之江西村傍被殺夜間口令致身



二十六日晴午前五點半歸仁村頭人及彌篤率家口來營言昨夜初更時夷匪多人不知其數尙有已經投順之人附和於中來該村廝殺伊全家逃出野宿一夜余計算如匪果來此時尙未能退去當卽派軍士十餘名國民軍八名前去追逐午後一小時人回殊無跡兆只江西坡頂人聲嘈雜我軍射擊卽擊斃一名帶傷數名此番彌篤聞人傳言自起驚疑廝殺之事未必真也現因人少不能分駐該處彌篤來依我宿營地夜間口令盡瘁

二十七日半晴陰駐上帕工作午前彌篤家人來言昨晚夷匪七八十人攻歸仁村燒其茅屋一間夷匪帶傷數名天明始退尙聚集於岩道之后方余令今晚若再來攻卽速報信以便派兵往擊傍晚借與彌篤銅帽槍一桿伊乃歸該村去夜間口令蓄銳二十八日早陰午后晴駐上帕工作前五時彌篤來人言岩之后方夷匪聚集數十人來請兵去保護當派國民軍六人前往午后接何委員后路辦糧之人來函言上江耳竹洛頭人娃臘妄聽匪謠率徒謀反截殺臘早國民軍一名現在堵住要口請兵救

援云云命將來函轉遞何委員處夜間口令牽掣

二十九日陰雨駐上帕工作午前九點寄書回賞以銀牌寄黃鍾瑞一函飭調查娃臘反叛事情回復並逐傳木刻與各寨令以後該寨所管之地各自稽查匪人倘有截殺往來人等犯在何地卽爲該地人是問同時接何委員來函擬請帶同國民軍上行查辦娃臘事復允其請午后派軍士二人同國民軍交駐歸仁村夜間兩口令遷民三十日終日雨停工夜間口令研究

七月第一號終日雨停工午後五點半施朶頭人來報饒利新到漢兵約百人彌篤之子聞信邀集祿馬登人及江西幹布面葛各寨人有百八十餘匪於今夜前往饒利劫殺我後軍阿烏堵人將岩之棧道拆去截住要口當賞該頭人衛生帽一頂飭卽回歸仁村令彌朶派人連夜修棧道並致黃鍾瑞一函囑告我後軍如果匪來卽行殺下祿馬登我軍定於明早上行至祿馬登應援堵匪歸路限寄信人於明日下晚回信夜間口令援助

第二號陰乍兩午前二時早膳后派人預備當命小隊長一員副官三員軍士十五名  
國民軍十二名於三點鐘出發囑至祿馬登援接後軍並調查前日殺團兵事若後軍  
人數多可分一半駐該處回時經黑拉洛大浦洛兩寨調查其反狀六點半派崇義村  
哨夫十五名至喇烏接何委員軍士及國民軍回營同守因我軍出征只餘十餘名病  
人在營故也午后駐喇烏之國民軍十四名回營夜間口令分遣

第三號陰乍兩午前十點鐘何委員拔隊回營傍晚我開赴祿馬登之軍回營九名其  
餘開往黑拉洛阿烏堵各寨查勘反覆情形據回軍士云慾匪聚人劫營之事未得徵  
兆惟祿馬登人舉寨逃亡屋中什物木板全行拆去實反叛可證已將空屋燒燬上行  
至把格拉接遇我後軍係第八聯隊之大排到來三十名明日抵營夜間口令攻心

第四號陰欲兩午前十點鐘往黑拉洛大浦洛查勘之軍士回言該數寨遷逃甚多形  
迹可疑人少未便搜山而還午后步兵第七聯隊第二大隊第一中隊之劉小隊長郝  
小隊長帶兵三十名到來前派出運糧之何發春亦回言木廷舉狡滑之狀退回辦糧

之銀並將我寄存之鹽轉賣代購之油肉亦毫未運來我軍久缺油肉此地亦毫不  
購而劉小隊中亦未代米蔬來不禁憂傷三點鐘殺牛餉軍士夜間口令制敵

第五號晴我軍工作何副委員請於明日上行查辦阿主洛反叛事我軍因工作牽制  
未便外應擬自代劉小隊長軍士下行接景委員軍來合力晚間商之劉郝二小隊長  
均言任務業已盡到擬回富川駐紮余思開關怒地爲我軍負完全之任務未便強勉  
轉令何委員率國民軍下行接景軍會合後由江西而來夜間口令長征

第六號晴我軍工作九點鐘何委員率隊下行給以門牌壹百八十張囑有投誠者即  
給予以爲識別劉小隊軍士休息夜間口令懷遠

第七號半晴陰我軍工作午后命人赴大村派夫明日送劉小隊回呈師長一函請陣  
亡正兵楊煥川恤賞及手槍小口經槍夜間口令實邊

第八號半晴陰我軍工作午前八小時劉郝二小隊長拔隊回富川派庶務一名同出  
富川催運供給言若後方添兵則急速辦來若未添兵則俟我景軍到時派人來解午



后接國民軍第六營蕭哨官來函調前來之軍士回防臘早保護教堂當即回復言俟由下行回時即遣回防夜間口令殖民

第九號兩我軍耕作夜間口令尙武

第十號兩我軍耕作午后野雪地頭人送到家信一函及何委員信一函轉令該頭人招前日反叛各寨人之逃往江西者夜間口令知方

十一日乍晴兩我軍工作夜間口令思忠

十二日晴我軍工耕各半營之後方山上來投誠三家夜間口令防微

十三日晴我軍工耕各半午前十時金左洛人送來何委員傳木（書字於木板之上用以代書也）言第七號午前十時行至密斯米里隘口江之對岸爲臘土甲夷匪聚集於此以槍弩遙射我軍我軍亦以槍對射約經兩點鐘時我軍負傷一名擊傷夷匪數名夷匪始退第十號下行至刮箴底江東各寨均來投誠再下則村落寥寥擄夫難集擬在此駐候景音當回函囑速急通信與景軍或專人或派夫傳遞斟酌行之午后

上帕人屠娃嘴等投誠十家夜間口令遠慮

十四日晴傍晚雨我軍工作是日官長室築成夜間口令深思

十五日晴我軍工作午后前日派去辦理耳竹洛之人回追究出龍元四十枚言各寨人均無反狀然尙恐我軍進勦願代追王臘賊欸晚發傳單十三張仍令來人明日上行給予各寨頭人令轉諭所屬毋自驚疑逃散仍嚴究王臘賊欸夜間口令慰勞

十六日晴我軍耕作午前九時大村措夫由富川運鹽菜油肉蕘回八名十一時辦理耳竹洛之人上行發給江東耳竹洛綺綠尼咱拉焉底瓦雞獨秋咱阿有萃列彌得多巴已以阻栗色括狄不江立十三寨傳單夜間口令安邊

十七日晴夜雨我軍工作午前九點景副委員之傳單到來業與何副委員會合聞何軍現在紮篋篋將過江西十一點安哨長率兵四棚到來接到麗江府公文二角令坐鎮江東不必渡江并接友人數函午後接到喃團總一函言前日團兵被劫事夜間口令寧靜

十八日晴夜雨我軍工作我軍疲勞已久疾病多發工作之銳氣大爲減色移維西

協

文一封與安哨長之軍士撥借維西積谷二十石致維西協一函爲和哨長文灼解釋

因前日何委員調來駐臘早之防兵李協有怪責之意故復致之

致喃團總一函及友人數函派崇義村人送出夜間口令

待治

十九日晴休息午后七時派已投之上帕人屠娃嘴赴江西各寨派糧并探該各寨人意向夜間口令限制

二十日晴我軍工作新來之軍士令其栽秧午后一時令彌篤派人赴江西尋找前在祿馬登被劫去之團兵給與命令一張夜間口令分任

二十一日晴我軍工作安哨長帶來之軍士亦派數名其餘栽秧午后四點景副委員率軍十五棚到來招投江西立五達等七寨夜間口令會師夜深微雨

二十二日陰雨我軍工作景軍休息犒以牛命石工尋覓磨石及確石遍尋不得夜間大雨土質不良雨漏甚口令決計

二十三日晴各軍工作栽秧上帕人黑阿嘴等來投九家命將土房加草午后何軍及國民軍楚回言本擬過江招撫因監督有令限制不得過江晚與前日陣亡軍士楊煥川作追悼會集合各軍演說四小時官軍各捐金恤助口令悼亡

二十四日晴各軍作工及栽秧午前十一點與副委員長委員等會議於前後所奉命令之中有疑難者質問數條夜間口令耐煩

二十五日晴辦八九十三個月分餉冊摺各軍照常工作夜間口令努力

二十六日半晴陰各軍工作命差遣員三員測繪營房附近略圖午后接甘庶務來函言滄江一帶米糧價昂而不能購前承辦之木廷舉亦繳銀卸責余力疾辦公件甚不能支夜間口令待詔

二十七日晴各軍工作是日駐臘早之國民軍和哨長率兵回防何委員亦率兵上行駐以洛命庶務楊程榮同往上江調查商務夜間口令計成

二十八日晴各軍工作午前八時前日派去江西調查之人回言江西各寨均無反詞



惟沽渠及幹布兩寨言詞稍傲祿馬登人亦回夜間口令威力

二十九日半晴陰各軍工作給算前三月伙食餉項夜間口令範圍

三十日陰放餉收集義助陣亡軍士楊煥川義助金五十兩令趙小隊長明日外出請  
八九十三月餉夜間口令仗義 委員長任宗熙記

手札

任委員長景何兩副委員長暨帥楊林各委員同覽趙委員來接閱函牘並面述一切  
均悉此次任委員長督率各員不避艱險深入愨地其猛勇精進實深嘉慰方冀得手  
之後着着進行忽閱來函全屬不諳外間部署情形以致全體誤會殊增焦灼特以規  
畫之苦心爲該員約略言之前此見該員等入愨以後消息難通呼應不靈轉運徵調  
既極困難會合策應尤爲間阻卽深切慮不意果有任委員長遇險之警何景兩委一  
則在上而不能趨赴一則在下而不能前進帥委血書告急對之使人心瘁在該員等  
擔任前方任務凡後方之接濟策應種種要務首尾不能兼顧不可無人居中策要明

矣現在源復解職該委員等更無就近稟承之人倘有事必直接省中不惟情形不習遙制爲難更恐呼籲不靈愈生險狀尤不可無一機關以爲樞紐亦彰彰明矣况前聞該員等警告姚總辦卽飛電策援旣分調防團前進復亟遣陸軍援應今幸未履危機豈遂遽忘前事且姚府長初委總辦卽力陳任委員長勇慨熱忱及各員勤勞艱苦堅辭總辦至再至三祇以公義敦迫勉受委任辭府長而任邊務尤爲恒人所難至函中傳述各節尤多紕繆此在明達事理者必知其不足信矧此行任用一人莫不加意選擇皆該員等所知此任得人尤難求人尤不易該員等當平心一細思之也至此一切籌畫如擴大殖邊隊之編制以及軍械被服各項之儲備該員等所已悉而以任委員長兼任提調前方任務責有專屬有何牽制然在該員等恪盡職務本不可無奮勇直前之概而源與姚總辦主持大體更不可無審慎以圖之心有相成無相妨者也至經營江西暫緩前進一節亦係適在據報該員等遇險之後思所以策萬全倘聽該員等深入而不爲之長顧卻慮是棄之也要之該員等須切念此方以國防之經營舉以

委之於該委員等責任何等重大且當解職之前事事亟爲籌備卽現在解職之後猶節節爲之主持所切望者惟在上下一心將士戮力毋渝初志共勗成功况開通之後移民殖邊通商業闢利源建設方長更非一手一足之烈乎幸勿妄生疑阻客氣用事辜厚望而隳前功行次匆匆不復多及餘事已面告趙委員轉達

另文請示各條答復於左一此次陣亡及受傷兵丁前經電准軍府照准最優例卹賞已令知在案至陣亡正兵楊煥川靈柩回籍歡迎一節候另文行知地方官辦理可也二嚮導員趙復興據稱異常出力着先傳諭嘉獎俟存記彙請獎敘三此次得力之學兵准照擇尤給予差遣員名目仍呈報總辦處查考四此項功章應由省鑄造發給俟回省商請軍府辦理五日兵工作勤苦自應酌給賞銀候飭姚總辦查照酌發以資鼓勵

勸

另文質問各節答復於左一殖邊隊新定編制應候姚總辦交卸府篆後乃能編配完全前派李安兩哨長帶往各棚係在據報遇險後恐該員等兵力單薄先行率往以厚

聲勢現姚總辦交卸府事及當按照定章妥爲編配也二三兩條餉項津貼均經明定辦法令飭辦理矣四節制土司純爲各隊在怒球地方進行時有須呼應便於調遣起見至各土司地方之事自有該管地方官管理姚總辦不日亦將親赴該處均毋庸過慮也五六兩條已於前段開示矣七糧臺一項自係後方應行妥爲籌備之事必不使前方匱乏八徵收各項如已照此辦理即准先行試辦俟後體察情形安定辦法可也九此節較爲重大一俟核議定奪即另文行知日記一冊委曲詳盡尤可見於勤苦之中具有條理已彙存查閱備刊矣再凡在職務上只應以命令爲憑斷無妄聽傳言各萌意見竟以此率行稟許之理惟念此次雖有不合在源無不略其迹而原其心以後共宜加勉切切根源手復